

Incende Iyasalwa

Na Lesa Iya Kupepelamo



Twiminine ifi fine pakashita ilyo tulekontamika imitwe yesu mwi pepo. Kabili nomba, ne mitwe yesu iyakontama, kabili ndesubila imitima yesu naikontama, nayo, nshishibe nibanga muno muno bushiku abenga temwa ukubebukisha mwi pepo, pa cintu cimo icikankala? Nga kuti mwaimya fye ukuboko kwenu, nokusosa, “Mwe Lesa, mpeleni muno bushiku cilya ico ndefwaya.” Shikulu amupale.

² Mwe Shifwe wa Mumulu, ilyo ifwe nomba mubufuke tulepalama ici Cipuna ca bufumu cikalamba ca luse, ku citetekelo, tuleselela mu Ncende shakutalii uko Lesa, kabili na Bamalaika, kabili na ba Kerubi, kabili ne bumba lyonse ilya Mumulu lilongene pamo. Pantu Atile teti kube nangu inseba ukupona panshi ukwabula Shifwe wa Mumulu ukukanaishiba. Cipulemo nifinga ifyo Eshibe muno ilyo abantu imyanda bali abakontamika imitwe yabo, no kulaita kuli Imwe ku fya kulomba ifikankala. Tata, lolesheni panshi pe sonde ililekabila muno bushiku, pantu tuli abantu abalekabila.

³ Kabili ndepepa, mwe Lesa, ukuti pantu ukuti natulongana pano no kulangisha kuli Imwe icitetekelo cesu muli Lesa uwa mweo Uyo uwasuka amapepo; natufumamo mukati ke sonde ilya bashasembululwa, ku mutima na matwi, ukufumamo ku kwikala ubumi ubwapatulwa, kabili no kwikala ku kulumbula icitetekelo cesu muli Imwe. Kabili muno bushiku natwimya amaboko yesu, no kusosa, “Tuli abakukabila.” Mwe Lesa, asukeni ifyakulomba fyabo fyonse.

⁴ Elyo kabili, Tata, tulepepa ukuti Mwalatutandalila muno bushiku mu Cebo. Twisa kuno mukulungamikwa, mu kwiluka, bakuti twingeshiba umusango uo twingekalilamo muli buno bushiku; icakuloleshako kuntanshi, ifyo twingacita. Pantu, twaliishiba Ukwisa kwakwa Shikulu kuleya kulepalama, ukulingana ne fishibilo fyonse ifyo bakasesema balandile libela. Tulepalamina ku nshita, Shikulu, ilyo ukupokololwa ukwapwililika kuli no kupelwa ku bana Benu. Mwe Lesa, tulekeni, bonse fye, tukabe kulya, Tata. Mwileka pakabe umo ukukanasangwako. Uyu e mulandu wesu tubebele muno, Shikulu. Twali Mutemwa, kabili tuleesha ukuiteyanya pali ilya nshita.

⁵ Landeni kuli ifwe, tulelomba nakabili, muno bushiku. Kabili posheni abalwele. Bonse abalwele kabili na balecushiwa abo abali mucikulwa, tulepepa ukuti

Mwalabaposha, Shikulu; kabili maka maka abo abali ne fya kukabila ku mupashi. Tulepepa ukuti Mwalapususha umweo uli onse uwaluba. Isusheni uwacetekela onse na Mupashi wa Mushilo. Kabili bwekeshenipo ubukose na Maka mu bana Benu abacetekela. Peleni ifi fintu, Tata. Tulelomba ifingi, pantu Mwalitwebele ukulomba, “lombeni ifingi, lombeni ifintu ifikalamba, nafyo ifingi,” pakutila insansa shesu shingesula. Kabili twafilombela mwi Shina lyakwa Yesu Kristu. Amenii.

Kuti mwaikala.

⁶ Mucine ndemona ci ukuba ishuko lyawama muno bushiku, pakubwekela kuno kuntanshi nakabili, muno muli ili sukulu lyapamulu, [high school—Kelu.] ku kukumanya aba bantu abasuma abalongene pano ku kumfwa Imbila nsuma. Ndelomba inkumbu shakwa Lesa ukungafwilisha ku kumweba Icine ukulingana nge fyo naishiba Icine. Neli line kuti Aisala akanwa ka muntu, umusango umo wine nge fyo Acitile akanwa ka nkalamo. Kabili nga kuti nalieseshe ukutala ukusosa icili conse ico icalubana kabili icapusana ku bufwayo Bwakwe, ipepo lyandi ilya bufumacumi lyakutila kuti Aisala akanwa kandi, ukuti teti ncisose. Pantu, cine cine, ndefwayo ukuba ku Mulu, ine wine; kabili kulya teti mbeko nakalya, kabili, kunse ya conse ici, kuti naba katungulula uwabufi, umo umuntu uwacitile icintu cimo mubufi. Nga kuti nacicita, ni pa mulandu nshishibepo no bupusano. Shikulu amupale.

⁷ Nomba, mailo lucelo, nga cabo bufwayo bwakwa Lesa, ndefwaya ukulanda pe sambililo lilya, *Icupo No Kulekana*. Kabili tulesubila ukuti mukesa, kabili mukaletе amapensulo yenu na mapepala. Tatwasende nshita itali, lelo kuti natemwa fye uku. . . Uyu ewali umulandu wandi uwakubwelela kuno, intanshi, mu Indiana, ukuti nalimilaya cilya. Kabili nkesha, mailo lucelo. Nga nshakaibule mailo lucelo, nkacita mailo bushiku. Lelo nkesha mailo lucelo, nga Shikulu asuminisha, ku kulanda pe sambililo, ama sukulu yabili ya matontonkanyo. Kabili Lesa engatwafwa ku kwishiba ico icabe Cine, ukwishiba fye ico icaba Cine, pakutila twingendela mu Cine kabili mu Lubuuto. Ifwe. . .

⁸ Mwalishiba, nalikwetepo umunandi umukote umusweshi. Atile kuli ine, atile, “Munyina Billy,” atile, “Nshi—nshilefwaya ubwafya ubuli bonse pa mumana.” Atile, “Ndefwaya ukuba ne tiketi lyandi mukuboko kwandi. Kabili ilyo pintu yalila, nshilefwaya ubwafya ubuli bonse kulya. Nalilomba kuli Shikulu, akale sana, nga pali cimo icalubana, lekeni nciwamye ino ine nshita,” atile, “pantu kukaba ukwafita kabili nama bimbi lilya mu lucelo ilyo ubwato bukabukila ku lubali lumbi.” Atile, “Nshilefwaya icakumfulunganya icili conse. Ndefwaya ukufiwamya fyonse fye nomba.” Ico eco tubelele pano, ukweshwa ukufiwamya fyonse fyakumfulunganya, pakutila tukaye tukengilemo pali ilya nshita.

⁹ Nomba, nshalande kuli imwe inshita itali sana muno bushiku, pantu tukakwata ukulongana kubili mailo. Elyo kabili nkesaba pa bulendo ilyo line, ku ncende kumbi, na kumbi, ukulongana ukwingi.

¹⁰ Lelo, nomba, mwi Buku lya Malango. Ndefwaya mbelenge ukufuma pa cipandwa ca 16, ama versi yatatu aya ayakubalilapo, aya Malango 16:1 ukufika pa 3.

*Bakeni umweshi wa Abibu, no kucite ca kucilila . . .
kuli Shikulu Lesa wenu; . . . mu (walenga cine) mweshi
wa Abibu Shikulu Lesa wenu amufumishe mu—mu
Egupti ubushiku.*

*Kabili mukaleipaila Shikulu Lesa wenu ica kucilila,
iya mu mukuni napamo iya mu maombe, kulya kuntu
uko Shikulu asala ku kubikako ishina lyakwe.*

¹¹ Nomba, isambililo lyandi muno bushiku nili: *Incende Iyasalwa Na Lesa Iya Kupepelamo.*

Nga mwalolekesha, umweshi A-b-i-bu palya, cipilibula, “April.” Umweshi wa April e lintu bafumishiwe.

Kabili nomba icintu iceni cakutila ifwe muno bushiku, nga bakupepa Lesa, muli buno bushiku ubo tuleikalamo, kabili tulesanga amano ayengi ayapusana aya bantu. Kabili lyonse fye ilyo pali amano ayapusana pa cintu cimo, kulingile kwaba amepusho ayapusana; kulingile kwaba ubwasuko bumo ubwacine ku lipusho lyonse ilipushiwa.

Nga kuti naipusha ilipusho, “Nicinshi *ici*?”

“Cisuna,” kuti basosa, “itebulo.”

“Ya mulimo nshi?” Mwamona?

¹² Nomba, kulya, umuntu umo kuti asosa, “Te tebulo iyo. Ni mbao.” Cisuma, ni mbao, lelo litebulo. Mwamona, kulingile kwaba ubwasuko ubwacine kuli bwena.

Kabili nga cakuti naipusha ilipusho pa cintu icili conse, kulingile kwaba ubwasuko ubwacine. Kutu kwabako icintu cimo icapalama kuli cena; lelo kulingile kwaba ubwasuko ubwacine, ubwasuko ubwine bwine kulipusho ilili lyonse. Eico, kanshi, ilipusho ilili lyonse ilyo ilisa mubumi bwesu, kulingile kwaba ubwacine, ubwasuko ubwalungama.

¹³ Kabili nomba, lelo, tulomfwa—tulomfwa balalanda ici, abengi abantu besu mwisonde lelo . . .

Napakuba minshoni, nalyenda amalendo ayengi ukuciluka bamba no kushinguluka calo, nali kumanapo nabukapepa ubwingi ubwapusana pusana, ubwapala nga Buddha, na Mohammedan, na Sikhs na Jains na bambipo, bukapepa bwa mwi sonde. Kabili muno mu mwesu mu United States; kabili nafimbi ifyalo fyakutali, ukukumana na machalichi yesu yonse ayapusana, ifyapala nga amachalichi yesu yafilonganino,

ukutendeka ne yakubalilapo Roman Catholic, kabili elyo na ba Greek, na bambipo, kabili ne—ne ntambi ishapusana, elyo kabili mulya mukati ka. . . inshita shonse sha filonganino, imyanda pabula na fimbipo ifilonganino ifyapusana ifya Protestant.

Nomba, cimo cimo muli fyena, mucine, kuti mwamona amatontonkanyo yabo, kabili teti mbebaule. Umo umo balanda ukuti bena e cine, balikwata icine. Kabili na bantu ababa kuli shilye nkuta balingile ukucetekela cilya, pantu balibika icifulo cabo—cabo, icifulo cabo ca Muyayaya, pafyo lulya lukuta lusambilisha. Kabili shaba ishapusana nganshi, lumo kulubiye, mpaka cipanga amepusho ayapusana imyanda pabula no kucila.

Eico, pakubapo amepusho imyanda pabula no kucila, kulingile kwaba Ubwasuko bumo ubwalungama. Kabili kuti natemwa ifwe muno bushiku, pakuba ukuti tuleesha ukuya ku Mulu, kabili no ku kumanya Shikulwifwe Yesu Uo twatemwa bonse, ndefwaya mfwaye mu Malembo ukusanga cilya.

¹⁴ Nomba, nga cakuti lipusho lya mu Baibele, ninshi lilingile ukukwata ubwasuko bwa mu Baibele. Tabulingile ukutala ukufumina mwibumba lya bantu, ukufuma mukulongana ukuli konse, atemwa ukufuma kuli kasambilisha umo, atemwa ukufuma mu cilonganino cimo. Bulingile ukufuma mu Malembo mwine, apo incende yakukumaninapo yakwa Lesa yaba, ya kupepelamo. Kabili cine, pakuba Lesa, kwaliba icifulo icakukumaninapo kumo, uko Akumanya.

¹⁵ Nomba, tulesanga ukuti pano mu Malango pano, pa kutendeka, Mose ukubelenga nakabili Amalembo, ifintu ifyo abebele; ifyo Abafumishe no kukalamba, ukuboko ukwakosa, ukufuma mu Egupti, kabili alibalengele intanshi ukwikala.

Baleitwa “abantu bakwa Lesa” mpaka ilyo bafumine mu Egupti, kabili lyena baitilwe “ulukuta lwakwa Lesa.” Pantu, ulukuta lwaba ukulongana, atemwa, mucituntulu, *ulukuta* cipilibula “abo abaitwa,” abo abali abaitwa. Kabili balifumine mu Egupti, pakutila bengaba lukuta.

¹⁶ Nomba Lesa alibele, ilyo bali. . . ilyo tabalakula itempile kabili na fyonse ifyo bacitile, “Ndinokusala incende Yandi yakupepelamo, kabili Nkabika Ishina Lyandi muli cena.” Kabili ilya e ncende fye yeka iyo Lesa akatala ukukumanya uli onse, cali ukupitila mukusala Kwakwe Umwine. Alisalile incende Yakwe. Kabili uko Asalile incende Yakwe, Abikilemo ne Shina Lyakwe. Versi yacibili pano iletweba cilya, “Ali no kubika Ishina Lyakwe mu ncende iyo Asalile abantu uku Mupepelamo.” Nomba, icintu pali cena nici, tulefwaya ukusanga uko ilye ncende yaba.

¹⁷ Na mano imyanda pabula no kucila ayapusana, pakuba ukutila tulecilila bukapepa bonse ubwacisenshi, kabili nokulanda fye pali bukapepa bwa Bwinakristu. Eico, nalibatemwa abasenshi, atemwa mucine nga nshiyako kulya

no kulanda kuli bena. Lelo, baba mucilubo. Ubwinakristu e bukapepa bweka ubwaba ubwacine, Bwinakristu. Kabili nshilesose ici tepamulandu fye wakutila ndi Mwinakristu; ni pa mulandu, nalicetekela cilya ukuba Iceine. E bukapepa bweka ubwaba ubwalungama.

¹⁸ Naliyako ku nshishi uko kabalwe uwabuta acinjwa lyonse panuma ya nsa shine. Uko, Mohammed, Shimapepo mukalamba kabili—kabili intungulushi panuma fye yakwa Kristu, alingile ukuba kasesema, kabili, nshiletwishika lelo fintu ali, lilya line panuma ya bamunyina ba Maccabee. Lelo ilyo bena... Alifwile. Alandile ukuti akabuka akesa cimfya isonde lyonse. Nomba, nalimo lyonse panuma ya nsa shine balacinja ba malonda, kabili balasunga kabalwe uwabuta pa nshinshi yakwe. Efyo bacita, pa myaka amakana yabili, ukumusubila ukubuka nakabili no kucimfya isonde. Lelo mwamona...

¹⁹ Kabili mwaya kuli Buddha; Buddha aikele imyaka imyanda iingi, nalimo imyaka amakana yabili ne myanda itatu iyapitapo, umulungu wa—wa Japan. Kabili eico ali uwamano sana, umo uwapala Confucius, kabili na bambipo.

Lelo bonse aba, uku...abatampile, kabili na bambipo, bonse fye balifwa na mano yabo, kabili balishikwa kabili baba mu nshinshi.

Lelo Ubwinakristu, ubo ubwaletelwe na Yesu Kristu, kwaba inshinshi umushaba kantu. Ali fye Umuntu eka uwaiminine pesonde, kabili alikele no kusosa kuti, “Ninkwata amaka ukusendamika ubumi Bwandi panshi no kubushibusha nakabili.” Kabili Alicicitile. Kabili Ali uwa mweo ne lelo.

Kabili twalishiba Aba no mweo, pantu Aba naifwe kabili alaishininkisha Umwine ku fishibilo ifituntulu ne fipapusho, ifyo Alaile ukuti Akacita ku kucilangisha. Icakutila, nge Ntumba ya Mulilo iyatungulwile abana ba Israel monse mu ciswebebe, ili naifwe lelo, icakuti Yalikopwa necikope caiko; ukubomba ifishibilo ne fipapusho ifyo Alaile ukuti Ikacita muli buno bushiku, ukumona fyonse Ifyebo ifyo Alaile ukulangishiwa buno bushiku. Eico, isonde lyonse ilya busenshi lili kunse. Bwinakristu!

²⁰ Nomba, pakuba ukuti kwaba amepusho imyanda pabula no kucila palwa uko Lesa akumanya, “Alakumana naba Methodist, atemwa Akumanya muli ba Baptist, kabili Akumanya—muli *ici*, na *cilya*, kabili cilya *cimbi*.” Nomba, pali ilipusho palya, eico uli onse alingile ukufwaya ipusukilo lyakwe no mwenso kabili no kututuma.

Lelo muno bushiku ndefwaya ukweshwa ukusanga, no kushininkisha mu Malembo, uko incende iyalinga yaba uko Lesa akumanya no kupepa pamo na bantu. Kabili, nga cilya eco, iyo e ncende fye yeka Akatala ukukumanya.

²¹ Nomba, twacisenda ili lyashi ukufuma mu Malango. Lishiwi lya ci Greek ilyakwata ubupilibulo bubili, atemwa, lipilibula, “amafunde yabili.” Ishiwi lya ci Greek, *Amalango*, lipilibula “amafunde yabili ayapusana.”

Kabili ifi fine fye efyo Lesa akwata, amafunde yabili ayapusana. Kabili limo pali yena lifunde lya mfwa, kabili limo pali yena lifunde lya Mweo. Lesa akwata amafunde yabili. Ukukonka Ena, no kubombela Ena no kupepa Ena, cena Mweo; uku Likana nimfwa. Mwaba amafunde yabili muli Lesa.

²² Nomba, limo pali aya mafunde lyali ishib-...yalengelwe ukwishibikwa mu calo, pa Lupili lwa Sinai. Lesa apele amafunde kuli Mose na Israel. Te mukutula amafunde yali no kubafwilisha, lelo ifunde lyalesontelela fye kuli bena ukuti bali ababembu. Mpaka ilya nshita, tabaishibe ifyo ulubembu lwali, mpaka ilyo bakwete amafunde. Teti kube funde ukwabula ukulimunwa. Ifunde talibe funde, ukwabulo kulimunwa. Eico, kanshi, “Ukutobaula kwa mafunde lubembu, kabili ne cilamba ca lubembu ni mfwa.” Eico kanshi, mpaka ilyo Lesa abapangile amafunde, takwali umulandu uwapelwe kuli bena.

Nga tapaba ifunde muno lisoso kuti teti mubutuke ukucila ama mailoshi amakumi yabili pa nsa, lyena kuti mwabutuka ukucila ama mailoshi amakumi yabili pa nsa. Lelo nga kwaliba ifunde lisoso ukuti tamulingile ukucicita, lyena pali ifunde kabili no kulimunwa kuli lyena.

²³ Nomba, imfwa, ifunde lya mfwa, yali amalango ayapelwe pa Lupili lwa Sinai, ayaebele umuntu ukuti ali umubembu. Kabili, ukutobaula amafunde yakwa Lesa, alifwile. Lelo tamwaba ipusukilo mu mafunde. A... Yali fye ni kapokola uyo uwinga kubika mucifungo; ta yakwete nangu kamo ku kumufumyamo.

Elyo nomba Apele ifunde nalimbi, cilya cali ni Palupili lwa Kabale, uko ulubembu lwabikilwe muli Yesu Kristu, kabili palya ukulimunwa kwali lipilwe. Kabili te pamo na... Ukwabula amafunde, “lelo ku nkumbu mwalipusushiwa,” ku nkumbu sha kwa Lesa, ukupitila mukulingilwa libela kwa kwishibilwa libela kwakwa Lesa kwa imwe ukubapo.

²⁴ Nomba tulemona aya amafunde yabili, Amalango, ukulanda pa mafunde yabili. Kwaliko amafunde yabili. Limo lyali lifunde lyamfwa, kabili ili limbi lifunde lya Mweo.

²⁵ Kabili kwaliko nakabili ifipangano fibili ifyapelwe ku bantu. Tukalanda pali yena mu lucelo.

Limo pali lyena lyapelwe kuli Adam ne fyakucitapo, “nga wacite *ci* kabili taulecita *cilya*,” lelo ilye funde lyalitobelwe. Adam, Eve alitobele lilya, mwibala lya Eden.

Elyo Lesa apangile icipangano cacibili, no kupela cilya kuli Abraham, kabili lilye funde talyakwete ifyakucitapo. “Te

ifyo ifyo wacita atemwa ifyo ukacita;” Atile, “Nincicita kale.” Shilya ni nkumbu. Lilya efunde lya Mweo. Lesa alicitile Abraham cilya na Babufyashi bakwe abaka mukonkapo, e kutila, bonse Ababufyashi ba kwa Abraham.

Nge fyo Baibele yasosa, “Israel onse akapusuka,” lelo ico tacilepilibula aba Yuda. Nge fyo Paulo asosele, “Ni ulya Israel uli mukati, atemwa Israel kunse.” “Kunse,” nga filya twalandile mu nshita ya bushiku bumbi, cali bana bakwa Isaki, muku kumana kwa mwaume no mwanakashi. Lelo ifunde lyakwa Lesa lyali ukupitila muli Kristu, uyo uwali Uwabufyashi Uwabufumu bwakwa Abraham, ukuti, “ku nkumbu Israel onse napusuka.” E kutila, “Bonse ababa muli Kristu balipusushiwa,” bonse, icipangano cakwa Lesa cacibili. Lelo fyonse ifi fintu fyali finshingwa palwa kwa Kristu.

²⁶ Nomba moneni versi yacibili. Versi yacibili apa mu Malango 16, “Ukupepa mu ncende iyo nsalile.” Nomba mulingile ukupepa Lesa, Atile, “Mu ncende umo nsalile; te ico ico umuntu umo asalile, lelo ico nsalile.”

Nomba, nga Lesaalisala incende, cikankala kuli ifwe ukusanga ifyo Asoselepo pali yena. Kabili nikwi yaba? Ndefwaya ukuisanga, pantu, cine cine, ndefwaya uku Mupepa.

Bonse ifwe tuli muno, muno bushiku, kuku Mupepa. Natwikala muno muno bushiku, nga ba Methodist, Baptist, Katolika, Inte shakwa Yehoba, Christian Science, kabili na bonse, lelo ifwe bonse tulefwaya icintu cimo.

Tulefwaya ukwishiba Icine. Baibele yatila, “Mukeshiba Icine, kabili ne Cine cikamulenga abantungwa.”

Umuntu umbi, teti wishibe ico ulecita, tawishibe ifyakucicita mpaka waishiba umusango winga cicitilamo; teti wishibe ifya kucita mpaka waishiba umusango winga cicitilamo, ntile. Ulingile ukwishiba ifyo ulecita kabili no musango wakucicitilamo.

²⁷ Ici ciletulanga ukuti Lesa alikwata incende yakukumaninamo kuli bakapepa Bakwe, mu ncende imo fye. Muli ilye ncende, mweka, Lesa alakumanya bakapepa Bakwe.

²⁸ Nomba, neci, incende iyo Asalile bakapepa Bakwe, Alandile ukuti Akabikamo Ishina Lyakwe. Nomba katufwaye no kusanga, ukupitila mu Malembo, uko iyi ncende yabela. Mucine, nga Lesa atile Ali nokubika Ishina Lyakwe muli iyi ncende uko Asalile ukukumanya abantu no kupepa nabo... atemwa bena uku Mupepa, ntile, cilya caba pacifulo cimo muli Baibele, pantu cali ca nshita shonse.

²⁹ Kabili Lesa umukalamba ushipilibuka teti apilibuke. Umuntu alapilibuka. Lelo kuti wabika umweo obe pacintu icili conse ico Lesa atala ukusosa pa nshita ili yonse, pantu cena ca

Cine. Cena ca Cine. Pantu, e cintu ceka ico ningakwata ukusubilamo, ni Baibele. Pantu, icebo ca muntu cikafilwa, lelo ica kwa Lesa calipulamo.

Uno mwaka ningile ukwishibaifingi ukucila ifyo naishibe umwaka uwapwile. Mulingile, naimwe, cila bushiku. Tatwaishiba fyonse, eico tulakwatilapo amano.

Lelo Lesa alishiba fyonse. Alishiba fyonse. Kabili, pakuba uwaishiba fyonse, teti Akwatilepo amano. Aba uwapwililika, icakubalilapo. Amapange yonse yalingile ukuba ayalungama bwino bwino.

³⁰ Kabili umusango Lesa abombele inshita imo, Alingile umuyayaya ukubomba ulya wine musango, nga teifyo Abombele mu musango uwalubana lintu Abombele umuku wakubalilapo. Nga cakuti umuntu alitala ukwisa kuli Lesa ku kupusushiwa, pa mulingo uo Amupokelelemo, cilingile ukupokelelwa pali ulya wine umulingo inshita ili yonse. Ico cishinka. Ngo muntu alitala ukwisa kuli Lesa pa kuposha kwa Bulesa, kabili Lesa amupokelele pa mulingo umo; umuntu umbi ukesa, Alingile ukumupokelela umusango umo wine, nga teifyo Alipangile icilubo ilyo Apokelele umuntu uwakubalilapo. Lesa alipangile umulingo apo Enga kumanishapo umuntu. Apangile umulingo ifyo Ali nokucita, umusango Ali nokucitilamo, kabili cilya cali ukupitila mu mulopa we lambo lya mwana wa mpaanga mwibala lya Eden. Lesa tatala, tapaba inshita, iyo atala ukucipilibula.

³¹ Alisalile ifyo Engapususha umuntu. Twalyesha ukusambilisha umuntu muli lyena; twalyesha ukubafunda, ukweshu ukubasambilisha, ukweshu ukubalonganika, ukweshu ukucita ifi fyonse ifintu ifyalekena lekana; ukubaletamo, ukubasunkilamo, ukubabatishamo, no musango uli onse uwabako, ukubaletamo mu makalata. Lelo caba filya fine, cimo cine, Lesa akumanya umuntu pa mulopa uwasumishiwa uwa mwana wa Mpaanga. Umulopa wali ni inshila yakwa Lesa pa kutendeka, kabili Umulopa ni nshila yakwa Lesa muno bushiku. Cisuma ukuya ku cilapilo kabili na fyonse fye ifi, lelo ipusukilo lishila fye ukupitila mu Mulopa. Umulopa e nshila imo Lesa asalile ukupususha umuntu, kabili teti Aipilibule.

³² Yobo akwete icintu cimo cine. Aliishibe ukuti ali uwalungama, pantu alipele i—ilambo ilyo Lesa amwipwishe ukucita.

³³ Nomba, lekeni tufwaye nombu tumone ifyo iyi ncende yaba, ne ncende Abikilemo Ishina Lyakwe. Twalasanga uko Abikile Ishina Lyakwe. Lyena, nga twasanga ifyo Ishina lyakwa Lesa lyaba kabili noko Alibika, lyena ninshi twakwata incende iyakupepelamo lilya line nga twasanga cilya.

Fyonse ifi fintu, mucine, fyali finshingwa ifya fintu ifyaleisa. Amafunde yonse yali ifinshingwa ifya fintu ifyaleisa.

³⁴ Nga filya, umweshi cinshingwa ca kasuba. Ulabomba akasuba nga takalipo, nga filya Ulukuta lulingile ukubomba ilyo U-m-w-a-n-a wa kwa Lesa talipo. Ilyo tapali Umwana, Ulubuuto ulunono, Ulukuta, abacetekela, balabombela Lesa ku kupelo Lubuuto ilyo Umwana talipo. Lelo ilyo akasuba katula, tatu umona umweshi nakabili, pantu nawibila. Takafwaya ulubuuto lwakwe nakabili, pantu usenda fye ulubuuto lwakwe mumusango umbi, ukufuma pa kasuba. Nomba, kwati umulume no mukashi, akasuba no mweshi fyaba, Ulukuta na Kristu.

³⁵ Nomba tulesanga, ukuti, ifi fintu pakuba ifinshingwa fyakwa Kristu. Ilambo ilili lyonse, umutebeto, kabili necili conse mu Cipingo Cakale, fyalelangisha Kristu; nga filya icinshingwa ilyo cisa panshi. Nomba pano epo twalaisa tukwate ukusanga incende iyalungama iyakupepelamo, kanshi kubwekela uku mu Cipingo Cakale uko yapelwe no kumona ifyo ifi fintu fyali.

³⁶ Nomba, ilyo icinshingwa caisa panshi, kuti walanda nga cakuti mwaume, mwanakashi, atemwa iciswango, atemwa conse ifyo cingaba, pantu calakwata icinshingwa palya panshi. Kabili ilyo cilye cinshingwa cileya cileipipa, icinshingwa ukukanaba icintu icituntulu; kabili teti kube icishili icituntulu ukwabula icituntulu. Kanshi, ilyo icituntulu caisa mupepi ku cishili cituntulu, icishili cituntulu cilaminwa ku cituntulu. Icinshingwa kabili ne—kabili ne cituntulu filesa capamo, kabili cilya e cicilenga ukuba icituntulu.

Kabili nga cakuti “fyonse ifintu ifyakale,” Baibele itila, “mu Cipingo Cakale, fyali ifinshingwa ifya fintu ifyaleisa,” lyena kanshi Kristu ali cinshingwa ca fintu ifyaleisa.

³⁷ Eico kuti twamona, mu fipasho fya mu Cipingo Cakale, uko Asalile ukubika Ishina Lyakwe, kabili uku. . .kuli nomba. Nomba, nga filya icinshingwa caba, ukuciluka panshi, natile, icishili cituntulu, pakuba icipasho. Eico ifwe, bakapepa, nakabili kuti twamona ifinshingwa fya mu Cipingo Cakale ukupwililila mu cituntulu ica mu Cipyaa.

³⁸ Nomba, ifya malila fyonse, inshiku shakutusha, ihema lyonse, umutengo onse, icili conse mwi hema, ifili fyonse fyapashenye Kristu. Ifya musangulo fyonse, amafunde yonse, fyonse fye fyali mu cipasho cakwa Kristu. Twalipita muli lyena, inshita ne nshita, kuno ku Tabernacle.

Lyena kuti twamona, kuli ifi, ukuti ifundisho lyonse, ulukuta, ne cilonganino nafishala kunuma ukutali. Tafyabamo na mukucimfyanya, nakalya. Ifundisho lyonse, ulukuta ululi lonse, icilonganino icili conse, fyali fumishiwapo umupwilapo. Tapaba incende ya fyena nakalya.

³⁹ Tapaba icapashanyiwa mu Cipingo Cakale, atemwa apali ponse muli Baibele, pa lukuta, lelo ukwampana ukwakupatikisha ukwa lupungu lwa Babel. Ecintu fye ceka

icipashanya ukwampana. Pantu, cali ukupitila muli Nimrod, umuntu umubi uwaile kunge no kupatikisha utufyalo tonse utunono ukwisa mu ncende imo kabili neci cilupungu cikalamba. Cali ukupepa kwa bukapepa, mucine, lelo tacasuminishiwe mu Cebo cakwa Lesa. Eico palya epo mumona bukapepa bwa filonganino ukupashanyiwa, kulupungu Iwa Babel, mu Cipingo Cakale. Icaba, ubu bukapepa bwali cine cine bukapepa, lelo tabwali bukapepa bwa Cebo cakwa Lesa.

⁴⁰ Lesa tatala ukubika Ishina Lyakwe mu cilonganino icili conse. Ndefwaya Ilembo pali cena, nga eflyo caba. Nalishiba basosa ukuti Alicita, lelo Tacita. Teti abike Ishina Lyakwe mu ncende ishing, pantu Atile abikile Ishina Lyakwe mu ncende imo. Kabili, ilye ncende imo, cila cilonganino cesu cifwaya ukusosa ukuti baba ilye ncende, lelo cintu capusana.

Lelo nikwisa uko Abikile Ishina Lyakwe?

⁴¹ Nomba, kabili, Ena, Ishina Lyakwe nani, intanshi? Tulingile ukusanga (Ishina) ifyo Ishina lyakwa Lesa lyaba ilyo tatulasanga ifyo caba ico Alebika mu ncende.

Nomba, tulesanga ukuti Akwete ifya kulumbwilako ifingi. Etwa uwa . . . Aleitwa “Tata,” icaba ica kulumbwilako. Kabili Aleitwa “Mwana,” icaba cakulumbwilako. Aleitwa “Mupashi wa Mushilo,” icaba icakulumbwilako. Aleitwa “Nsalankwale wa mu Sharon,” icaba icakulumbwilako. “Cananika uwa Mumipokapoka,” cakulumbwilako, “Ulutanda Iwa lucelo.” “Jehova-Jireh, Jehova-Rapha,” amashina yakulumbwilako, ayapusana cine lubali, ayengi, kabili yonse fye yali fya kulumbwilako. Tapali nangu limo pali yena iliyali mashina.

Lelo Alikwata Ishina.

⁴² Ilyo Akumenye Mose, ninshi Talakwata Ishina ilya nshita, kabili Aebele Mose, “NABA UNTU NABA.” Kabili ilyo tulemona Yesu pe sonde, ukulanda mu Bahebere icipandwa ca 6. . . Munjeleleko, Yohane Washila icipandwa ca 6. Atile, “NABA UNTU NABA.”

Batile,” Cinshi, Uli Umuntu ushafika ne myaka yakufyalwa amakumi yasano, kabili ulesosa ukuti ‘Walimona Abraham?’”

⁴³ Atile, “Ilyo takulaba Abraham, “NINE.” Kabili “NINE” ali Ulya, icumpusa calepya, Ntumba ya Mulilo iyo yali mu cimpusa calepya munshiku shakwa Mose, ulya “NABA UNTU NABA.”

⁴⁴ Kabili nomba tulesanga ukuti Yesu asosele, nakabili, “Naishile mwi Shina lyakwa Tata, kabili imwe tamwa Mpokelele.” Kanshi, Ishina lyakwa Tata lilingile ukuba Yesu. Cishinke co. Ishina lyakwa Tata ni Yesu, pantu Yesu e fyo asosele. “Ninkwata Ishina lyakwa Tata. Naishile mwi Shina lyakwa Tata, kabili imwe tamwa Mpokelele.” Kanshi, Ishina Lyakwe ali ni Yesu.

Kabili na Gabriel Amwitile Yesu, bakasesema ba Mwitile Yesu, kabili cine cine Ali Yesu. Ilyo Talafyalwa, nangu ni kasesema uwa mushilo aitle Ishina Lyakwe *Emmanuel*. icipilibula, “Les a ba naifwe.” Kanshi, “Les a amonekele mu mubili, pakutula engafumya ulubembu lwa calo,” kabili, mukucite co, Apelwe Ishina lyakwa Yesu. Eico, Yesu e Shina.

Kabili ne Shina lyabikilwe mu Muntu; te lukuta, te cilonganino, te fundisho, lelo Umuntu! Asalile ukubika Ishina Lyakwe muli Yesu Kristu. Nomba tulesanga ukuti kanshi Aisa mukuba incende yakupepelamo yakwa Les a, uko mu Mupepela.

⁴⁵ Lintu fye Talati nangu ukufyalwa, Ishina Lyakwe aleitwa Yesu. Cali icikankala sana, lyapelwe kuli banyina na Malaika Gabriel, ukuti Ishina Lyakwe liketwa “Yesu, Umwana wakwa Les a,” fintu Ali.

⁴⁶ Ili natulikwata, kanshi. Ili elyo, lyeka. Elyo, Ilyakwe eka, incende iyasalwa na Les a iyakupepelamo. Incende yakwa Les a, asala. Les a asalile ukukumana no muntu; tacali mu lukuta, tacali mu cilonganino, te mwifundisho, lelo muli Kristu. Ilya e ncende fye yeka Les a akakumanya umuntu, kabili kuti apepa Les a, ni muli Kristu. Ilya e ncende fye yeka. Temulandu nga uli Methodist, Baptist, Catholic, Protestant, icili conse ico wingaba, kwaba fye incende imo uko wingapepa Les a mu kulungama, mulya ni muli Kristu.

Abena Roma 8:1, yatila, “Eico takuli nomba ukusekwa ku bali muli Kristu Yesu, abashenda umwalolo mubili, lelo umwalolo Umupashi.” Iyo e Mbila nsuma.

⁴⁷ Kuti twapusana pa mafundisho. Kuti twapusana pamasambilisho ayapangwa no muntu. Kuti mwaya ku lukuta lwa Methodist, mulingile ukuba Methodist; Baptist, Baptist; Catholic, Catholic. Lelo ilyo mwabatishiwa muli Kristu, kabili mwaba icilundwa ca Mubili Wakwe takuba ukupusana. Ifibumba fya pakati filalepulwa kabili mwaba abantungwa, pantu mwaba muli Kristu Yesu. Kabili mupepela Les a mu Mupashi na mu Cine ilyo mwaba muli Kristu Yesu. Yaba amapange yakwa Les a yakuli imwe kukumupepa Ena muli Kristu Yesu.

⁴⁸ Nomba, tapali ulukuta lwa cilonganino ulwingasosa pali ici, tapali nangu umo ungasosa cilya. Kuti caba shani imwe ukulanda ifya musango uyo? Ukucita icintu ica musango yu kuti caba umupashi wa mukanya Kristu, kuti kwaba ukufumyako kuli Kristu; ukufumya kuli Wene. Teti mucite cilya. Kristu e ncende fye yeka umo Les a akumanya bakapepa.

⁴⁹ Batila, lelo. Nalikwetepo abantu ukunjeba. Umuntu alinjitile tekale sana, mu Beaumont, Texas. Atile, “Ba Branham, nga ishina lyenu talyaba mwi buku lyesu lya lukuta, tekuti muye ku Mulu.” Bushe kuti mwatala ukutontonkanyapo pali cilya? Mwilacetekela icintu camusango

ulya. Batontonkanya ukuti mulingile mwaba ku lukuta lumu nga teifyo teti muye ku Mulu. Ico cilubo. Ukucetekela cilya, kuba mukanyakristu. Nalasoze ci: Nga mwacetekela umupashi wa filya, mwaliluba. Cilya cilangililo icisuma ukuti mwaliluba, pantu kufumyako kufyo Lesa acitile. Lesa tatala ukubika Ishina Lyakwe mu lukuta ululi lonse. Ali Libikile mu Mwana Wakwe, Kristu Yesu, lintu Ena no Mwana Wakwe baishileba Umo. Ilya e ncende iine-ine yakupepelamo. Takwali imifula imbi iyabikilwe, takwali icilibwe na cimbi.

Pali Kristu, Icilibwe cakosa, naliiminina;
Imishili yonse yashala micanga iibila.

Ifilonganino fikalepuka no kuwa, inko shikapita, lelo Ena akabelela Umuyayaya. Takuli incende naimbi iyo umuntu engasanga, ku kupepa Lesa, uko Lesa akalanshanya nankwe, takwaba incende lelo muli Kristu Yesu. Ilya e ncende fye yeka, incende fye yeka iyo Lesa asalile ukubika Ishina Lyakwe, kabili incende fye yeka iyo Akakumanya umuntu, ku kupepa. Mwaliluba, ukucetekela fimbi ifyashala.

⁵⁰ Moneni, yonse amalila cine lubali ya ci Yuda yasungilwe mu ncende imo ine. Tabatalile ukusunga ukulila kumo pamo ukwaba Methodist, kabili kumbi ulubali lwa kuno kwaba Baptist, kumo ulubali lwa kulya kwaba Presbterian, kumo kunuma kuno kwaba Katolika, kabili kumo kwaba Protestant. Yonse amalila cine lubali yasungilwe mu ncende imo ine.

⁵¹ Cipasho icisuma sana pano. Twapwishishe fye Inshita Cine Lubali Isha Nkuta, ukulanga ukuti Lesa asungile shonse Inshita sha Nkuta Cine lubali mu Cebo, pantu cila nshita ya lukuta yaetele iciputulwa ca Cebo, kabili cilanshita ilyo baciletele kabili balemona Ulubuuto.

Nga filya abantu abasangile intanshi ukubatisha mwi Shina lyakwa Yesu. Cinshi ico Bacitile? Bapangile icilonganino ukufuma muli lweni, kabili cali fwile palya pene. Elyo Lesa aliselele ukuya fye ku muntu umbi. Teti ekale muli fimo ifya ifyo amafundisho ne fisumino. Takwatapo nangu cimo icakucita kuli cena. Tapaba nangu cimo icipilibulwa pali Lesa. Icebo cakwa Lesa ca mushilo, umushaba kabi, Kristu e cifulo cakwa Lesa capakati ca kupepelamo. Ena ni Lesa.

⁵² Yonse amalila cine lubali yalingile ukusungwa muli iyi incende imo. Tekuti mubike amalila mu ncende imbi ili yonse. Kano yalya cine lubali, incende... Amalila cine lubali ya mwaka yalingile ukubikwa mu ncende imo. Kanshi, Inshita sha Nkuta Cine lubali shafumine mu ncende imo, ulya ali ni Kristu ukulanda mu Nshita sha Lukuta shonse Cine lubali. Ico cishinka sana. Icipasho, ca Nshita sha Lukuta Cine lubali, lelo bapangile ifilonganino ukufuma muli shena.

⁵³ Nomba katulolekeshe ku cipasho nacimbi ilyo tucili kuli ulu lubali, cilya, cipasho ca cakucilila, calelangisha libela

Yesu. Tulemona apa ilambo lya mulopa, ku mfwa. Ilambo lya mulopa yali incende iyalangishe libela Kristu. Bushe icilonganino kuti casumyo mulopa; kuti mwatontokanya ulukuta ukusumyo mulopa, ukusumyo mulopa kwa cilonganino? Awe nakalya. Casendele umulopa, ku kusumya ukufuma mu bumi. Kabili, ubumi, apa Yesu aleisa mukumonekela ukupitila ku mwana wa mpaanga. Umwana wa mpaanga ali icipasho cakwa Kristu, kabili alangishe libela Kristu, pantu Ali “Umwana wa mpaanga wakwa Lesa,” uo Yohane alangishe, “uyo usende membu sha calo.” Tulesanga Yesu aleisa mukumonekela, umu mu Kufuma icipandwa ca 12.

⁵⁴ Moneni, yali e ncende fye yeka imfwa teti yumepo. Ilyo imfwa yali mupepi ukume mpanga, kwaliko incende imo; bonse abali kunse ya ici balifwile. Incende fye imo! Nomba, tacilepilibula cali ni ng’anda imo; lelo kwali incende imo, kulya eko umwana wa mpaanga aipaiwe. Palya apali umulopa wa mwana wa mpaanga, malaika wamfwa teti ome, pantu e yali incende imo yeka Lesa abikile Ishina Lyakwe. Kabili ulyo mwana wa mpaanga alinikwe kulya kunuma mukutendeka, umwana wa mpaanga. Moneni, e yali incende yeka iyo teti ome.

⁵⁵ Kabili nomba cimo cine eflyo caba nelelo. Kwaba fye incende iyo imfwa yaku mupashi teti yumemo, neci Cebo. Imfwa teti yume Icebo, pantu Cena Cebo cakwa Lesa ica mweo.

Lelo nga mwabikako amafundisho kuli Cena, Icebo cilayendela Icine ceka. Cikaipatula nga filya amenshi ukufuma ku mafuta. Tekuti mucisankanye capamo. Kanshi, mwamona, ilyo amafundisho yaisa mu cilonganino, bonse bakonka amafundisho; kabili ne Cebo cilafwa, kabili cilatwalilila no muntu umbi no ku Sanduluka nganshi. Cilapokelela amaka, ilyo Cileya ukufuma ku kulekelelwa, ukusangululwa, ulubatisho lwa Mupashi wa Mushilo, kabili ukulaya fye mpaka fye ku Luseke! Bushe mulemona inshila iyo Lesa aendamo? Ukuleta Ishina Lyakwe, inshita fye yonse, ukwisa fye inshila imo ine, pantu Ena Cebo.

Moneni, tekuti lifwe. Icebo ca Mweo teti cifwe.

⁵⁶ Moneni ifyo capwililika, nomba. Malaika wamfwa tabamukenye ukuma abantu bamasambililo ba mu Egupti. Tamukenye kukuma impanga shakwe sha bukata, ifikulwa fyakwe ifikalamba, ba Farao bakwe. Atemwa, bashimapepo ba mulya, malaika tabamukenye ukuma. Kuti auma icikulwa icili conse, incende ili yonse, uli onse, lelo tekuti ome pantu umwana wa mpaanga ali.

Imfwa teti yume apali incende iyapekanishiwa na Lesa, kabili iyo ni mu Mwana wa Mpaanga.

⁵⁷ Moneni, tapali nangu ni...ali leshiwe ku kuma Israel atemwa bashimapepo bakwe baci Hebere, kabili, atemwa

ifilonganino fyabo ifili fyonse. Fyonse filingile fyaba mu ncende iyasalwa na Lesa, incende iyapelwa, nga teifyo imfwa kuma.

⁵⁸ Mwe Lukuta, konse kuntu muli, ico mwabako, tacilepanga ubupusano ubuli bonse kuli ine. Lelo, kwaba icintu cimo mulingile ukwishiba, mulingile ukuba muli Kristu nga teifyo ninshi mwafwa. Tekuti mwikale kunse ka Ena. Ulukuta lweni kuti limbi lwabafye bwino, nge cikulwa; ukulongana kwenu kuti kwaba fye bwino, ngo muntu. Lelo ilyo mwakana Umubili, Umulopa, Icebo cakwa Yesu Kristu, muli abafwa ilyaine miniti mwacita. Wene e ncende iyasalwa na Lesa iyakupepelapo. Palya e paba Ishina Lyakwe, cine cine. Palya epo Asalile ukubika Ishina Lyakwe; te mulukuta, lelo mu Mwana, Yesu Kristu.

⁵⁹ Moneni, ukucingililwa kwabelele fye mu ncende umo Ena asalile, mu mwana wa mpaanga Wakwe, kabili mwi shina lya mwana wa mpaanga.

⁶⁰ Moneni, Ali “umwaume,” umwana wa mpanga, umwaume, te mwanakashi. Te lukuta, umwanakashi; lelo Ishina Lyakwe, te shina lya mwanakashi. Uko Ali nokukumanya abantu tacali mwi shina lya mwanakashi, lelo mwi Shina Lyakwe, Umwaume, Umwana wa Mpanga!

⁶¹ Nomba tusosa, “Ulukuta, ulukalamba, ulukuta ulwapulamo, acitile *ici*, kabili acitile *cilya*. Alipita mu mabimbi. Natufulilako mu mpendwa. Twaba abengi mu mpendwa. Twaba ulukuta ulwapulamo. Aba icintu icikalamba.”

Lelo Lesa tatalile ukulandapo icili conse pa mwanakashi. Atile, “Wene.” “Wene,” e ncende yakukumaninapo, Umwana wa Mpanga, te lukuta. Te shina lya mwanakashi, lelo Ishina Lyakwe. Tabikilepo ishina lya mwanakashi ukuli konse. Abikile Ishina Lyakwe muli “Wene”!

Emulandu wine, “Fyonse ifyo tulingile ukucita, mu cebo nangu mu kubomba, tulingile twacitila fyonse mwi Shina lyakwa Yesu Kristu.” Nga tulepepa, tulingile ukupepela mwi Shina lyakwa Yesu. Nga tulepapata, tulingile ukulombela mwi Shina lyakwa Yesu. Nga tuleenda, twendele mwi Shina lyakwa Yesu. Nga tulelanda, tulandila mwi Shina lyakwa Yesu. Nga tulebatisha, tulingile ukubatishisha mwi Shina lyakwa Yesu Kristu. Pantu, “Fyonse ifyo tucita mu cebo nangu mu kubomba, ficitileni mwi Shina lyakwa Yesu Kristu.”

⁶² Umulumendo atile kuli ine inshita imo, ukulanshanya cilya, atile, “Munyina Branham, umukashi wandi, nshile. . .” Atile “Ena, ishina lyakwa lya *Kuti-ne lya-kuti*.” Ni kapyunga, limbi naikala muno nomba. Kabili atile, “Umukashi wandi,” atile, “akwate ishina lyandi.” Nalasosa fye *Jones*, pantu tali ni Jones. Atile, “Nomba, talingile ukubuka cila lucelo, abula icipyango no kusosa, ‘Nomba ndepyanga panshi mwi shina

lyakwa Jones, kabili ndesuka mbale mwi shina lyakwa Jones, kabili ndakambike fyakufwala mwi shina lyakwa Jones.” Atile, “Nshiletontokanya mulingile ukulumbule ishina ilili lyonse nakalya.”

Natile, “Ndecetekela ulacita.” Ico cishinka.

Kabili atile, “Cisuma, cinshi? Talingile ukulilumbula. Icili conse ico acita caba mwi shina lyakwa Jones, icakubalilapo.”

⁶³ Natile, “Lelo tawaile uleenda mu musebo no kumusenda, no kusosa, ‘Isa kuno, Jones.’ Aishileba, intanshi, ukupitila mu kusefya, ukusefya kwa cupo, ‘Jones.’ Nga tacitile, uleikala mubucende. Kabili nga wabatisiwa inshila shimbi ishishala lelo te mwi Shina lyakwa Yesu Kristu, lubatisho lwa bucende, ulutishangwa mu Baibele.”

Eico, “Ico mulecita mu cebo na mu kubomba, citileni fyonse mwi Shina lyakwa Yesu,” panuma yacilya, ico mulecita. Lelo intanshi mulingile ukwisa mwi Shina Lyakwe.

⁶⁴ Muli abengi abanakashi abasuma muli cino cikulwa muno bushiku, abasuma, abanakashi abacishinka; lelo kwaba fye umo Muka William Branham. Ena e uya ku ng’anda pamo naine. Ena ewaba umukashi wandi.

⁶⁵ Kwaliba abantu abasuma mu calo, inkuta ishisuma; lelo kwaba fye umo Muka Yesu Kristu, kabili ulya eo Aleishila. Palya epekala Ishina Lyakwe. Palya epaba ukupepa Kwakwe, muli Wene kabili Wene fye eka. Ico cishinka. Owe, eah, mukwai. Tulesanga ico ukube cishinka.

⁶⁶ Nomba, emulandu wine, ifwe, “Fyonse ifyo tulecita mu cebo nangu mu kubomba, tuficitila mwi Shina lyakwa Yesu Kristu.”

“Takwaba ishina limbi ilyapelwa mwi samba lya Mulu umwa kupusukila, kano Ishina lyakwa Yesu Kristu.” Imilimo ya Batumwa, icipandwa ca cibili, lyasosa kuti, “Lekeni cishibwe kuli imwe...” “Takwaba ishina limbi ilyapelwa mwisamba lya Mulu umo umuntu enga pusukila, kano fye Ishina lyakwa Yesu Kristu.” Ameni. Ndesubila mulecumfwa. Ishina lyakwa Yesu Kristu, conse...

Umulu wa Pamulu wainikwa Ena, “Ulupwa lonse ku Mulu lwainikwa Yesu,” Baibele yasosa, “kabili no lupwa lonse pe sonde lwainikwa Yesu.” Eico lilya e Shina lyakwa Lesa ilyasalwa kabili umo Ena Alibika. Ilya e ncende Yakwe yakupepelamo, ni muli Yesu Kristu. Nomba, twalishiba cilya ukube fyo, takwaba incende imbi umwakupepela kano muli Wene.

⁶⁷ “Takwaba ishina limbi mwi samba lya Mulu ilyapelwa pakati kabantu, umo balingile ukupusukila.” Ilyakwe li Shina lyakwa Lesa ilya kulubwilako. Lesa alikwata ishina ilitwa Jehova-Jireh, Jehova-rapha, Jehova-Jireh. “Shikulu alelekelela imembu shenu shonse.” *Jehova-rapha*, “Shikulu alaposhwa amalwele yenu yonse.” Alikwete ifyakulumbwilako ifingi. Lelo

Alikwata Ishina limo ilya Kulubwilako, ilyo ilyapelwa ku mutundu wa bantu, kabili lilya li Shina lyakwa “Yesu.” Lilya e Shina Lyakwe, Asalile ukubika. Nikwisa uko Alibikile? Alibikile muli Kristu.

⁶⁸ Yonse yambi amashina yalukuta, amafundisho, ifyakulumbwilako, nimfwa ukusubila muli fyena. Mulesubila ulukuta lwa Methodist ukumusenda ku Mulu, mwaliluba. Nga mulesubila ba Pentecost, ulukuta lwa Pentecost ukumutwala ku Mulu, mwaliluba. Kabili ba Baptist, ba Lutheran, Presbyterian, Catholic, ulukuta ululi lonse; mulesubila ishina lyabo, atemwa icakulumbwilako, cabo atemwa amafundisho yabo, mwaliluba.

Pantu, tekuti mupepe no kupepa mpaka intanshi mwaisa mu ncende yakupepelamo. Ameni. Ilya e ncende fye yeka umo Lesa akumanya bakapepa, e ncende Asalile ukubika Ishina Lyakwe. Bonse abashala, mukasubile muli bena, mukafwa. Ena nao. . .

⁶⁹ Icinshingwa cimbi cakwa Yesu pano, nincilemba apa, Ilembo. Nalyo, Ali—Alilangishe libela pano, “Alingile ukuba uwabula akalema.” Incende Abika Ishina Lyakwe, uyu umwana wa mpaanga alingile ukuba uwabula akalema.

Nomba, cilonganino nshi atemwa imicitile mwinga shininako ici; lukuta nshi, Catholic, Protestant, Jewish, conse fintu caba? Micitile nshi, icilonganino, ico mwingashininako cilya, “ukwabula akalema pali cena”? Conse nacikanwa, no kusulwa!

Lelo kwalibako incende! Halleluyah! Ilya ncende yaba muli Yesu Kristu. Tapaba nakalema pali Wene. Tamwaba icilubo muli Wene.

Teti mushinine ici. Bonse aba bantu abesha ukucite co, abasosa ukuti ulukuta lwabo talwakwata icilubo kabili na fyonse *ifi*. Cabusali, bakatoba ba Cebo, abatemwa, abafwa lubali, abena Laodikia, ifundisho, lelo tacabe ca Cine. Lelo nangu ni Pilato umwine, umulwani Wakwe, atile, “Tekuti nsange icilubo muli Wene.” Umulwani Wakwe Wine apele bunte tamwali icilubo muli Wene. Teti mushinine ulubembu ululi lonse pali Wene.

⁷⁰ Atile kuli ba shimapepo ba munshiku Shakwe, “Nani muli imwe uwinga Nshinino ulubembu? Nani uwinga Nangisha ukuti Ndi mubembu?”

Munjebe ulukuta lumo ulwingasosa ukuti tabatala ukucitapo icilubo icili conse. Mucine, tapaba nangu lumo pali shena, tapaba, lelo ifyo ifyaipaya no kucita ifili fyonse ifyaba pali calender ukucita, tapaba. Elyo nalyo line ukulaita abene. . . Awe, tafyaba incende yakukumaninapo nokupepelapo Lesa, mu mafundisho ayali yonse atemwa icilonganino.

⁷¹ Mwe banandi, nshilefwaya ukumilengo kumfwo bubi, lelo nali kwato mulimo ku Mbila, kabili, ilye Mbila niyi, “Fumeni muli ici cimfulunganya!” Kabili nga namulombo ukufumamo, nikwisa uko ndi nokumutwala? Bushe kuti namusenda ku Branham Tabernacle? Yali kwate ifilubo nga aya yonse ayashala.

Lelo kwaba incende imo iyo ninga mutwalako, uko mwingaba bwino no kucingililwa ku mfwa, nomo ni muli Yesu Kristu. Ni ncende yakwa Lesa yakupepelamo. Ilya e ncende ndemulangisha, muno bushiku, uko Lesa abikile Ishina Lyakwe. Uko Alaile Ali noku kumana no muntu uli onse uwingesa mulya, kuti Apepa pamo nankwe no kulila pamo nankwe, umo ni muli Kristu; te mulukuta nangu lumo, tapali tabernacle.

Lelo, muli Kristu, Ena li Hema lyakwa Lesa. Ena aba e ncende iyo Lesa aishilemo, Umwine, kabili aikele muli Wene. “Uyu e Mwana wandi umutemwikwa, Uo mbekelwa ukwikalamo.” Mulya emo Lesa aikele, aletele Ishina Lyakwe no Kulibika pali, Yesu Kristu. Kanshi, Ishina Lyakwe lyabikilwe mu Muntu, Umwana Wakwe, Yesu Kristu, umo Aikele Umwine, kabili muli lilye Tabernacle.

Uko, mu cipasho, Jerusalemu uwakale, amalila yakale, itempile lyakale, lyali icipasho; lintu icushi caleingilamo, ubushiku ubo icipao caleingilamo, ica cipangano, no kwikala panshi, kabili ne Shiwi lyakwa Lesa lyaumfwikilwe muli cena.

E fyo ne Shiwi lyakwa Lesa lyaumfwike, ukwisa mwi Hema, Yesu Kristu; icaba, Ifyakale (ifyacifyalilwa) fyali icipasho kabili icinshingwa ca Cipy. Kabili ilyo Aishile muli Kristu, Atile, “Uyu e Mwana Wandi Umutemwikwa, Uo mbekelwaukwikalamo. Kabili ndi nokusala incende umo Nkabika Ishina Lyandi, kabili uko Nkakumanyo muntu, kabili apo Nkalapepela.” Lesa asalile incende; te mulukuta lwa cilonganino, lelo muli Yesu Kristu. Eah, mukwai.

⁷² Alingile nakabili ukuba “ukwabula akalema,” nge fyo nacilanda. Tapali icilonganino icingaipela cilya. Balacita; ni ba mukanyakristu.

⁷³ Nomba tulesanga ukuti pano, moneni icinshingwa Cakwe nakabili. U—umwana wa mpaanga alingile ukusungwa. Nomba, ici cisangwa mu Kufuma 12, nga mulecilemba, Ukufuma 12:3 ukufika pa 6. Umwana wa mpaanga alingile ukusungwa inshiku shine, ku kumweshwa, ukumona nga cakuti ali uwalinga ku kube lambo nangu iyoo. Alingile ukusendwa, ukumumona libili libili, pa nshiku shine, ukumona nga pali akalema pali ena, ukumona nga pali ubulwele muli ena, ukumona nga pali icalubana icili conse mu mwana wa mpaanga. Alingile ukusungwa inshiku shine.

⁷⁴ Nomba moneni. Bamo muli imwe nga mwalitontonkenye ukuti cilya cali icinono, uku mwipaya pa bushiku bwalenga ikumi na shine. Lelo, muleibukisha, babulile umwana wa

mpaanga pa bushiku ubwalenga ikumi limo ubwa mweshi, kabili balemwipaya pa bushiku bwalenga ikumi na shine ubwa mweshi, mwamona, asungilwe inshiku shine.

⁷⁵ Nomba, Yesu, Ishina lyakwa Lesa, Umwana wa mpaanga, aile mu Yerusalemu kabili tafumine nakabili mpaka panuma ya mfwa Yakwe, ukushikwa, no kututubuka. Asungilwe mumunwe yabakususha pa nshiku shine sha kasuba ne nshiku shine sha bushiku. Ifyo cabe capwililika uyo Mwana wa mpaanga apashanyiwe, asungilwe inshiku shine. E lilya lintu Pilato atile, “Nshilesange icilubo muli Wene.”

⁷⁶ Icinshingwa ca Ena nacimbi, takwali ifupa ilingatobeka muli Wene, ico icali icapwililika, ici teti bacicite. Mukwipaya ilambo, tekuti bakontole ifupa. Nga ali, baletikana. Kabili balimishe inondo ukuti bakontaule amafupa ya mu molu yakwa Kristu, elyo basosele, “Nafwa kale.” Balashile mu mbafu Shakwe kabili basangile Umulopa na menshi.

⁷⁷ Moneni nakabili icintu nacimbi icikalamba pano. Tekuti nciluke, pantu Ali imininweko mu fya cakuninika, icakuninika, ca bunga.

Ndeibukisha inshita imo balikwete isukulu, muli Baibebe, yaleitwa isukulu lya bakasesema, kabili lyali lisukulu iline line. Kabili tulesanga ukuti Eliya alile kulya kuli lilye sukulu ubushiku bumo, kabili batile, “Ifwe. . .” Balimulombele ukuti aleya, batile, “Ilyo uli kuli cino cifulo, ifintu filalondoloka nganshi.” Eico bafwaile ukuti aleya.

Kabili balile ukuya mukumufwaila icakulya ca cungulo. Kabili ibumba lya bashimapapo lyalile, atemwa bakasesema, ukuyabule ntongwe, ku kumwipikila icakulya ca cungulo. Kabili ilyo bacitile, basendele ishingwi ukwisusha akamufuko; kabili ilyo babwelele, cali inkombo sha mu mpanga, isho ishali isha bwanga, kabili bali shiposele mu mpoto. Kabili ne mpoto shatendeke ukubilauka, kabili bena, umuntu umo, atile, “Ala, muli mfwa mu mpoto. Nomba tekuti tulye nakalya.”

Kabili Eliya atile, “Ndeteleni ubunga mulupi.” Kabili abulile ubunga no kubuposela mu mpoto, kabili atile, “Lyeni. Impoto naiposhiwa.”

⁷⁸ Ubunga bwa cakuninika ali ni Kristu. Iciputulwa conse cabikilwe umusango umo wine, kabili na kaputulwa conse akanono kabunga kalingilwe ukupeleshiwa cimo cine, ku cakuninika ca bunga. Ukulangisha, ukuti, Aba ni kondapa. Alasende cifulo, kabili alafumyapo imfwa, no kubikapo Umweo; ku mafunde yabili. Halleluyah! Palya apali mfwa, incende imo; ilyo Kristu aisamo, Umweo ulesamo. Aba cimo cine mailo, ilelo, no muyayaya. Kabili kulya ukwali mfwa, kulya kwaishileba Umweo, pa mulandu wakuti Kristu aishilebikwamo, ubunga bwa ca kuninika.

⁷⁹ Ifyo yaba amasambililo ayakalamba ifyo ifi fingaba nga twingasende nshita ukufimona fyonse! Nomba moneni, tapali icebo nangu cimo icafinshingwa icafilwa. Tapali nangu icebo cimo icatalile ukufilwa, ica cinshingwa. Fyonse fyali pashenye mukupwililika.

Aba e ncende iyasalwa na Lesa iya kupepelamo, kabili Ishina yakwa Lesa lyapelwa kuli Wene. Aba e ncende yakwa Lesa yakupepelamo, kabili Ishina yakwa Lesa lyapelwa kuli Wene. Aba e Cebo cakwa Lesa, kabili Aba e Shina yakwa Lesa. Aba fyonse fibili Icebo cakwa Lesa kabili ne Shina yakwa Lesa. “Ali Icebo icapangilwe mu mubili.” Ali Icebo cakwa Lesa, Umwana wa mpaanga wakwa Lesa, Ishina yakwa Lesa, kabili ali ni Lesa. Ifyo e fintu Ali, iyasalwa kabili incende fye yeka iyakupepelamo kuli Lesa.

⁸⁰ Kabili Lesa alakana incende imbi ili yonse kano fye muli Yesu Kristu; teti mu Mupepe ukuli konse. Atile, “Ba Mpepa apafye, ukusambilisha kwi Sambilisho amafunde ya bantu.” Lelo twalikwata amafundisho, ne fisumino, kabili na fyonse fye, ifyo ifisambilisha iyi e nshila kabili *ilya* e nshila.

Kabili Yesu atile, “Nine Nshila, Icine, kabili no Mweo, kabili takuli umuntu uwingesa kuli Lesa kano fye ukupitila muli Ine.” Mu masihi yambi, “Nine Umwinshi kwicinka ya mpaanga. Bonse abali kunse nibakabolala.” Ena e cakupalamako eka. Ena e Mwinshi. Ena e Nshila, Icine, no Mweo, fyonse ifyabapo; apakwingililako peka, incende fye yeka, ukupepwa fye kweka, Ishina fye lyeka.

Fyonse fye filekakilwa kuli Yesu Kristu. Icipingo Cakale conse cakakilwa kuli Wene. Icipingo Cipyra cakakilwa kuli Wene. Kabili no Lukuta lwa kakilwa kuli Wene ilelo, ku Cebo ca mafunde Yakwe. Takwabako incende naimbi, atemwa Ishina na limbi, atemwa ukuli konse, uko Lesa atalile ukulaya ku ku kumanya umuntu; ni muli Yesu Kristu eka, incende Yakwe iyakupepelamo.

⁸¹ Moneni, Lesa alilaya ku ku kumanya bakapepa Bakwe mu ncende fye iyi yeka, kabili kulya kwaba ukusala Kwakwe Umwine; te kusala kwesu, tekutontonkanya kwesu; lelo ukutontonkanya Kwakwe, ukusala Kwakwe. Kabili ilingile yaba e ncende uko Abikile Ishina Lyakwe, uko Asalile. Eico twasanga ukuti natusanga uko Ishina Lyakwe lyali, ifyo Asalile, mu kusala Kwakwe Umwine.

⁸² Nomba apo twasanga incende umo Abika Ishina Lyakwe, mulya ni, muli Kristu Yesu, kabili takwaba incende naimbi, atemwa ishina nalimbi. Bushe namwikushiwa pali cilya? Soseni, “Ameni.” [Ulukuta lwatila, “Ameni.”—Ka.] Nomba, icintu pali cena nici, nga natusanga uko incende yaba... Incende iyakupepelapo taipokelelwa nangu kumo, kano fye muli Kristu.

Kuti mwalapila, kuti mwacita cilya, lelo tamulepepa nakalya. Mulelomba ubwelelo. Petro atile. . .

Pa Bushiku bwa Pentecost, ilyo baba mwene bonse balandile mu ndimi shimbi, kabili ifishibilo ifikalamba ne fipapusho ukulacitika, batendeke ukulaseka, ulukuta lwacitile, kabili batile, “Aba bantu nabekuta umwangashi upya. Balemoneka nga bantu abakolelwe. Ba. . .” Maria nacisungu, bonse fye, bali pamo, umwanda umo na makumi yabili ya bena. Kabili baletalantanta nga abantu abakolelwe, no kulandila mu ndimi shimbi, no kutwalilila. Batile, “Aba bantu nabekuta umwangashi upya.”

⁸³ Lelo Petro, ukwiminina, atile, “Mwe bantu na bamunyina, aba bantu tabekwite umwangashi upya, pantu ino ninshita yakulindimana kwa kasuba. Lelo ici nicilya icalandilwe kuli kasesema Joel, Lesa atile, cikaba mu nshiku sha kulekelesha, Nkapingolwela umupashi Wandu pa bantunse bonse; elyo abana benu abaume na bana benu abanakashi bakasesema; kabili pa basha Bandi abaume na banakashi Nkapingolwelapo Umupashi Wandu. Nkalinge fishibilo mu mulu, na panshi; umulilo, intumba sha mulilo, mufuka wa cushi. Cikesa fikilishiwa, ilyo tabulaisa Bushiku bwa kwa Shikulu ubukalamba kabili ubwakutinya, ukuti onse ukalilila kwi Shina lya kwa Shikulu akapusuka.”

⁸⁴ Ilyo baumfwile ici, cali bapitile ku mitima, kabili batile, “Mwe bantu na bamunyina, tulecita shani?”

⁸⁵ Petro atile, “Lapileni, onse uwamuli imwe, no kubatishiwa mwi Shina lya kwa Yesu Kristu ku kulekelelwa kwa membu shenu, kabili mukapokelela icabupe Umupashi wa Mushilo. Pantu ubulayo bwa ku nkulo shonse ishikesa.” Nomba tulesanga ukuti.

⁸⁶ Nomba tulefwaya ukusanga ifyo twingila *muli* Wene. Musango nshi twingengilamo muli iyi incende ya kupepelamo? Abena Korinti wantanshi 12 alepwishu ici, pantu, “Ku Mupashi umo! Te kupitila mu lukuta lumo, te kupitila mwifundisho limo, te kupitila muli kacema umo, te kupitila muli bishop umo, te kupitila muli shimapepo umo. Lelo, “Ku Mupashi umo uwa Mushilo bonse tulabatishiwa mu Mubili umo,” uwaba Umubili wakwa Yesu Kristu, no kunakila icabupe conse icaba muli ulya Mubili. Eah, mukwai! Te kuilunda, takuli ifyakusungila amafundisho, takuli ukupompa, ukutwala panshi, ukuposhanya, atemwa icili conse. Lelo, ku Kufyalwa tulabatishiwa mu Mubili wakwa Yesu Kristu! Amen. “Ku Mupashi wa Mushilo umo bonse tulabatishiwa mu Mubili umo.”

⁸⁷ Kabili inga ulyo Mubili nicinshi? “Pa kutendeka kwali Icebo, kabili Icebo cali pamo na Lesa, kabili Icebo ali ni Lesa. Kabili Icebo capangilwe mu buntunse no kwikala pakati kesu.” Kuti twaba shani muli ulya Mubili no kukana Icebo

cimo ca Cena, atemwa uku Cibika ku ncende imbi ukuti Tacaba nangu ni mu Mubili? Kuti twaesha shani ukucicita? Incende iyasalwa na Lesa!

⁸⁸ Moneni, kabili ilyo mwabatishiwa muli Wene, icine cine, icishininkisho icacine cakutula mulecetekela Wene, Icebo.

Kuti mwaba shani iciputulwa ca Ena kabili elyo no ku Mukana? Kuti nakana shani ukuboko kwandi ukuba ukuboko kwandi? Nga kwaba...Nga nacita, kwaliba cimo icalubana mu mano yandi. Kabili kuti nacita shani ine? Nga kwaliba cimo icalubana mu mano yandi, ukukana uku kuboko kwandi, ukukana uku kulu kwandi, kwaba icintu cimo icalubana mu mupashi ku wacetekela ulekana Icebo icili conse ico Lesa atalile ukusosa no kulaya. Kwaliba icintu cimo icalubana ku mupashi na ulya uwitwa uwacetekela.

⁸⁹ Tekuti mukane ilembo limo lya Ena, pantu mulabe cilundwa cimo cine. Muli cilundwa Cakwe pantu mwalibatishiwa muli Wene; Mupashi wa Mushilo na muleta mu Mubili wakwa Yesu Kristu. Ifyo cabe cintu cisuma!

⁹⁰ Lesa alikwete incende imo uko Akumenye—Akumenye Abraham, kabili kulya Abraham alipepele. Ukupitila monse mu Cipingo!

Kabili Icebo Cakwe icalaiwa cikelulwa muli imwe, na Ena. Bushe namumfwe co? Icebo ico Alaile ukufikilishiwa mu bushiku ubo tuleikalamo, mukaba inkalata iyalembwa ya kwa Lesa, iyabelengwa no muntu onse. Te fintu muitunga ukuba, lelo ifyo Lesa alecita ukupitila muli imwe, cikalandikisha ukucila icili conse ico mwingaitunga ukuba. Lesa atile, “Ifi fishibilo fikakonka abo abacetekela.” Cilya cilandila ukupitila muli imwe.

⁹¹ Alandile pali ino nshita, ifyo ifyali nokubapo nomba. Abacetekela baino nshita balingile ukucetekela Ici, ifyo Alaya lelo. Umusango umo wine nge fyo baingile mu cibwato, ku kupusushiwa; ukufuma mu Egupti ku kupusushiwa; balingile ukwisa muli Kristu, ku kupusushiwa nomba, ukwisa mu Mbila ya Cebo, ukuti Aba cimo cine mailo, ilelo, no muyayaya.

⁹² Musango nshi mwingila muli Wene? Mu lubatisho! Ulubatisho lwanshi, amenshi? ku Mupashi wa Mushilo! “Umupashi umo, bonse tulabatishiwa muli uyu mubili umo.”

⁹³ Kabili Icebo cakwe icabulayo, Takacite...Tamwakatale uku Cilula. Aka Cilula ukupitila muli imwe; ifyo mulecita, ifyo Alaile ukucita. Ulukuta ulule Mukonka lukapalana sana nga Ena mpaka abantu bakeshiba.

Lolekesheni kuli Petro na Yohane ilyo babepwishe palwa kuposha umuntu pa mpongolo itwa Yayemba. Batile, “Balishibe,” balya bashimapepo balishibe, “ukuti bonse babili bali abatutu kabili abashasambilila,” lelo bali mwene ukuti bali na Yesu. Pantu, (cinshi?) balecita ifintu ifyo Acitile.

⁹⁴ Alingile ukuba pa mulimo wakwa Wishi. Kabili lelo cilingile ukuba cimo cine.

⁹⁵ Nomba, ibukisheni, Aba cimo cine mailo, lelo, no muyayaya; pantu Lesa alamukumanya muli Wene, incende fye yeka iyabako; pantu kulya eko Asala ku kubika Ishina Lyakwe, muli Yesu. “Yesu” Lishina lyakwa Lesa. Ibukisheni, Tata, Mwana, Mupashi wa Mushilo, fyakulumbwilako Ishina “Yesu Kristu.”

⁹⁶ Ilyo Mateo atile, “Eico kabiyeni, mukasambilishe inko shonse, mukalebabatisha mwi Shina lyakwa Tata, lya Mwana, ne lya Mupashi wa Mushilo.”

Ifyo bailwila mumbi lelo, no kusosa, “Mwi shina lyakwa Tata, ishina lya Mwana, ishina lya Mupashi wa Mushilo.” Tacalembwa no kulembwa. Caba, “Mwi Shina,” limo, “lya kwa Tata, Mwana, Mupashi wa Mushilo.” *Tata* te shina, Mwana te shina, *Mupashi wa Mushilo* te shina; ca kulumbwilako.

Panuma ya nshiku ikumi, Petro aliminine no kutila, “Lapileni, onse muli imwe, kabili mu batishiwe mwi Shina lya kwa Yesu Kristu.” Nomba bushe alicitile ifyo Amwebele ukucita? Alicitile ifyo Amwebele ukucita. Ishina lya kwa Tata, Mwana, na Mupashi wa Mushilo ni “Shikulu Yesu Kristu.” Umuntu onse mu Cipingo Cipyabatishiwe mwi Shina lya kwa Shikulu Yesu Kristu.

⁹⁷ Tapaba umuntu nangu umu muli Baibele uwatalile ukubatishiwa mu fya kulumbwilako fya Tata, Mwana, Mupashi wa Mushilo. Cilya tacatalile ukubapo mpaka amafundisho ya ku Nicaea yabikilwe kulya ku Nicaea, Rome. Lyali lifunde lya lukuta lwa Katolika, lwatendeke, ukushininkisha icintu cimo cine, muli katikism. Nalikwata, cishinke co, *Ifishinka Fya Citetekelo Cesu*, kabili na fimbipo, cilya cine cine lifundisho lya Roman Catholic. Bakamweba ukuti tamwaba muli Baibele; lelo basosa ukuti balikwata amaka ukupilibula filya Fyebo, nga balefwaya, pamulandu wakwa papa. Nalipusana.

Yesu Kristu aba cimo cine mailo, lelo, no muyayaya. “Kabili uyo onse ukafumya Icebo cimo ukufuma muli iyi Baibele,” efyo Yesu asosele, “atemwa ukulunda icebo cimo kuli Yena, iciputulwa cakwe cikafumishiwa ukufuma mwi Buku lya Mweo.” Icebo Cimo te mulaini, atemwa icipandwa, lelo Icebo! “Uyo onse ukafumya Icebo cimo . . .”

⁹⁸ Mukutendeka, Lesa acingilile abantu Bakwe ne Cebo Cakwe. Icebo Cimo, ukucilwila mumbi, calengele imfwa yonse, ukukalipwa kwa mutima konse, ubulanda bonse. Eva, tatobele umulaini; atobele Icebo. Ilyo Yesu aishile pakati ke Buku . . . Lilya e lyali Buku lyaku balilapo.

Lintu Yesu aishile pakati ke Buku, finshi eflyo Engasosa? “Calilembwa ukuti umuntu takekalile no mweo ku cilyo ceka, lelo ku Cebo conse icifuma mu kanwa ka kwa Lesa.”

Ku mpela ye Buku, Ukusokolola icipandwa ca 22, na versi ya 18, ku mpela kwine ya Baibele, Yesu alelanda Umwine, atile, “Ndesoka nati ngo muntu uli onse akafumyapo Icebo cimo ukufuma muli ili Buku, atemwa ukulunda icebo cimo kuli Cena, iciputulwa cakwe cikafumishiwa mwi Buku lya Mweo,” pantu ni kasesema wabufi kabili nailwila mumbi abantu, kabili umulopa wabo ukalambulwa pa kuboko kwakwe, pakucite co.

⁹⁹ Tulingile ukusunga ilye ncende imo iyakupepelamo, neyi ni, Yesu Kristu Icebo, cimo cine maillo, lelo, no muyayaya. Amen. Cisuma. Ibukisheni, tapaba incende naimbi iyakupepelamo, tapaba incende. Lesa ali Isalile.

¹⁰⁰ Yohane, kulya kunuma kulya pa kuba pakati ka Cipingo ca Kale ne Cipy. Mukutikishe nomba. Mulolekeshe sana. Yohane, ulya kapumpe umukalamba, aishile alepupuka ukufuma mu ciswebebe ubushiku bumo, amapindo yakwe ayakalamba nayatambalikwa. Aishile yaka kulya ku lulamba lwa Yordan, kapumpe kabili kasesema umukalamba uyo uwapangile ubulalo pakati kanshila ya Cipingo Cakale ne Cipy, kabili alibetile ukufuma ku kwakulyo no kwa kuso. Alebila ubushiku bwa kulapila.

Kulya kwaishileko ama Fariseo na ba Seduki; Atile, “Mwitendeka ukulailandila mwebene amuti, ‘Tuli na shifwe Abraham,’ pantu ndemweba nati Lesa ali na maka ya kubushisha Abraham abana mu mabwe aya.” Owe, ine!

Ilyo atendeke ukusalanganya Imbila nsuma yakwe kunse, no kusosa, “Napeminina Umo pakati kenu, Uo tamwaishiba. Nshilati na nomba uku Mwishiba, lelo nka Mwishiba nga Aisa. Nshalinga ukukakule indyato Shakwe. Lelo Akamubatisha ku Mupashi wa Mushilo naku Mulilo. Ulupe Lwakwe luli mu minwe Yakwe; Akelulula cipumino Cakwe, kabili Akoce misungu mu Mulilo uushingashimishiwa.”

¹⁰¹ Kapumpe umukalamba wa Mbila nsuma naikala palya, ilyo aishile shingulukwa ne fya ku mutinya ifikalamba. Kabili aba busali baishile monekela, atemwa Herod, infumu pali ilye nshita, kabilo, aupile umukashi wakwa munyina. Kabili kuti mwaelenganya ulya kapumpe mukalamba wa Mbila nsuma naikala palya kabili ukuba tondolo pali cilya?

Bamo pali bena batile, “Wishimikila pa cupo no kulekana nomba, Yohane, pantu palya naikala Herod.”

¹⁰² Aile fye mu cinso cakwe no kutila, “Tacasuminishiwa kuli iwe ukumukwata.” Cisuma!

Cinshi, ena, ali cinshi? Ali ni ulya kapumpe ukufuma mu ciswebebe. Ta sambilishiwe mu fya kutinya no kutitikisha kwa

bantu, ba cilonganino cimo. Lelo asambilishiwe ukupitila mu maka yakwa Lesa Uwapulamo, ku kwishiba cilya icali no kuba kulya. Alishibe icilangililo ca kwa Messiah.

Halleluyah! Ishiwi lipilibula, “Lumbanyeni Lesa wesu!” Mwiumfwo mwenso. Nshatala ukukalifyapo umuntu na nomba. Nshi saminwe. Ninjishiba pantu njiminine.

Yangu, nga natontonkanya pali ena, ulya kapumpe umukalamba alepupuka kunse kulya no kwikala panshi! Atile, “Nkesa Mwishiba nga Aisa.” Ubushiku bumo ali iminine palya, aleshimikila.

¹⁰³ Bashimapepo bali kulya ku lubali lumbi, batile, “Ulepilibulo kuti ku kesaba inshita imo amalambo yacila bushiku yakafumishiwapo; ili tempele likalamba ilyo twakula, kabili no mulimo onse twacita, ifwe icilonganino icikalamba?”

Atile, “Ku kesaba inshita ilyo fyonse fikafumishiwapo.”

“Teti cibe. Uli kasesema wa bufi!”

¹⁰⁴ Kabili alolekeshe mumbali. Atile, “Moneni, Ulya ali palya! Ilya palya incende yasalwa na Lesa yakupepelamo. Ulya palya Umwana wa Mpaanga, Umwana wa Mpaanga umwinemwine usendo lubembu lwa pe sonde.” Tasosele ukuti, “Aba baleisa ba Methodist, aba baleisa ba Baptist, atemwa ba Katolika.” Atile, “Ulya uleisa Umwana wa Mpaanga wa kwa Lesa uyo usenda ulubembu lwa pe sonde.”

Icifulo ceka ica cingililwa icabako caba muli ulya Umwana wa Mpaanga wa kwa Lesa. Muli Wene mweka e mwaba ipusukilo; te mu mulukuta ulili lonse, amafundisho ayali yonse, abantu abali bonse, tata uli onse, mayo uli onse, umuntu wa mushilo uli onse, atemwa icishili nangu cimo, incende ya mushilo. Caba muli Lesa wa Mushilo, Shikulu Yesu Kristu, umo Lesa abikile Ishina Lyakwe pa Cibumbwa ca muntu, ku kulubwilako, Uwalipile umutengo wa ifwe ababembu. Ilya e ncende fye yeka iyabamo ipusukilo. Lilya e Libwe naimininipo.

¹⁰⁵ Yohane ali Mwishibe. Atile, “Nsha Mwishibe ilyo na Mumwene aleisa ukulaenda, lelo konse kulya uko nasambilile. . .” Te mu seminario nge fyo bawishi bacitile; tali nga shimapepo, uwasambilishiwa. Lelo mu ciswebebe, kuntu ali mu seminario ya Bushimapepo ya kwa Lesa Uwapulamo, ukulolela Icebo ca kwa Lesa; te filya ifyo ibumba lya bantu bamo baleta, lelo pafyo Lesa alandile pali Cena. Kabili ilyo Yohane alolekeshe mu mulu no kumona Umupashi ukulaisa, atile, “Ndepelo bunte, uyu ni Ena.” Owe, Ine!

Ico icifulo cenu icakupepelamo. Iyo incende yenu yakufisamamo. Uyo Umwana wa Mpanga wa kwa Lesa usenda ulubembu lwa pe sonde. Te lukuta nangu lumu, te mafundisho, atemwa tapali nangu cimbi, lelo Umwana wa Mpaanga wa kwa Lesa uyo usenda ulubembu lwa pe sonde.

¹⁰⁶ Mwamona ifyo Yohane aibikile? Tasosele ukuti, “Imwe mwe ma Fariseo muli abalungika, imwe ba Seduki, ama Herodians.” Atile, “Ulya Umwana wa Mpaanga.” Ilya encende. Ali kwata Shina. Ena Eo. Tapaba Ishina limbi pe samba ya Mulu!

¹⁰⁷ Moneni ifyo Yesu asosele pali Yohane nomba. Ubushiku bumo Yohane atumine kuli Wene, ukumona ifyo Alecita. Yesu atile pali wene, “Ali lulya ulubuuto ulukalamba ulwabalike,” ukubalanga inshila iyalungama iyo balingile ukukonka lintu Talaisa, ukwisa Kwakwe kwa ntanshi. Kutikisheni. Mwicilufya. Yesu atile, “Yohane ali lulya lubuuto.” Malaki 3, tapali kulufyanya! Kasesema no lubuuto ulukalamba ulwalebalika lwa langishe Yesu ngo wali Eka fye, “Umwana wa Mpaanga.” Bonse bambi abana ba mpaanga abo balya bashimapepo balelandapo, kabili na fyonse fye ifintu fimbi, fyali ifya buwelewele. Uyu uwali apa “Umwana wa Mpaanga!” umuntu no lubuuto ulukalamba ulwalebalika ulo... Yesu atile ena ali.

Malaki 3 atile, “Nkatuma inkombe Yandi kuntanshi Yandi ku kuteyanya inshila.” Kabili ulya wine uwatuminwe ku kuteyanya inshila, ali Mulangishe ukube ncende. “Ulya Eo! Tapali icilubo. Ulya Eo! Ndemona icishibilo cile Mukonka. Ninjishiba ukuti ulya Eo; Ulubuuto lwalikile panshi ukufuma ku Mulu kabili ukulaikilila pali Wene.” Cali cituntulu, ulya ali Eo.

¹⁰⁸ Kanshi, munyinane, ndefwaya nkwipushe icintu cimo, mukwisala. Kuti twasosa ici. Muli Malaki 4, bushe ifwe tatwalaiwa kapumpe naumbi, Intumba ya Mulilo ukulakonka, ku kulangisha ulukuta ulwaluba buno bushiku ukuti Aba Abahebere 13:8, “cimo cine mailo, lelo, no muyayaya”? Bushe ta twalaiwa naumbi ukwisa alepupuka ukufuma mu matololo? Ameni! Cilya Cishinka icapwililika. Ifyo calingana no kupalana na Luka 17:30, uko Umwana wa muntu (Kapumpe) akesa isokolola Umwine ku kuleta panshi incende shonse shimbi isha kupepelamo, ishapala ifilonganino kabili ne fyashala!

Lesasalile incende Yakwe. Yohane atile, “Ilya Ili palya!”

¹⁰⁹ Elyo kabili twalilaiwa icintu cimo cine muli buno bushiku, Malaki 4, “Ku kubwisha imitima ya bana kunuma,” ukusoso kuti Tafwa iyo, ifi fintu tafyaba fya nshita imbi; ulubatishe mwi Shina Iya kwa Yesu talwali lwa kunuma kulya, lelo nomba Aba cimo cine. Ameni. Ukuleta panshi incende shonse shimbi isha kupepelamo, ifi efyo kapumpe wa bushiku bwa kulekelesha akacita, ukulangisha ukuti conse icabapo pali cena buwelewele, icilonganino kutumpa, lelo ukubasontelela nakabili ne cishibilo cimo cine ico acitile, ukuti Acitile cimo cine mailo, lelo, no muyayaya. Hallelluyah!

¹¹⁰ Ici naco, mu Kusokolola 4:7, twakwete Ifyamweo fine ifyo twapwisha ukupitamo.

Icakubalilapo cali, twalisangile, cali inkalamo. Cilya ecali ica Mweo ca kubalilapo icafumine no kuya kumanya ukususha ukwa bulya bushiku, Inkalamo ya Mukowa wa Yuda.

Panuma ya Ena paishile ica Mweo cimbi! Kabili tulesanga ukuti, ica Mweo cimbi cali umwana wa ng'ombe, ica mweo ca cisendo, ilambo. Mu nshiku sha Roman cathedral, Ulukuta lwalifwile; ilambo.

Cimbi calishile, cali umuntu, cali ica Mweo ne cinso ca muntu. Kabili ulya muntu ali bakapuputula, ukusambilila kwa muntu, ifya bulesa, kabili na fimbipo.

Lelo ica Mweo ca kulekelesha cali no kupupuka, ica Mweo ca kulekelesha icali nokwisa, Baibele yatila cali ni kapumpe ulepupuka. Halleluyah! Kabili kasesema atile, muli buno bushiku bwakulekelesha, "Cikabo Lubuuto." Owe, ine! "Muli bulya bushiku kukaba Ulubuuto."

¹¹¹ Kwali ubushiku bwa bakapuputula. Kwali ubushiku ubwali fye icinshingwa, tekuti bwitwe akasuba nangu ubushiku. Lelo mu nshita ya cungulo bushiku, mu nshita ya kwa Kapumpe:

Kukaba Ulubuuto pa nshita ya kwa Kapumpe,
Inshila ya Kubukata mukaisanga cine cine;
Mu nshila ya menshi muli Ulubuuto lelo,
Ukushikwa mwi Shina Iya kwa Yesu isuma.
Abaice na bakalamba, lapileni ku membu shenu
shonse,
Mupashi wa Mushilo cine cine aka mubatishamo;
Pantu ama Lubuuto aya cungulo bushiku nayesa,
Cabe cishinka ukuti Lesa na Kristu baba Umo.

¹¹² Ameni! Kukabo Lubuuto pa nshita ya cungulo bushiku, incende iyasalwa na Lesa yeka iya kupepelamo. Owe, cinshi iyi Mbila ishile, ni cinshi ico Ali nokucita? Kabili mu bushiku bwakwe kukaba Ulubuuto pa nshita ya cungulo bushiku, kabili (cinshi?) ku kupokelela abana Bakwe ukubwekela ku munshi mu Mpanga ya bulayo iya cine, ku cishibilo cimo cine ca Ntumba ya Mulilo iyo iyatungulwile abana ba Israel ukupita mu ciswebebe.

Incende iyasalwa na Lesa ku kupepelamo, Yesu Kristu. E ncende fye yeka iyabapo. Lilya e Shina fye lyeka Lesa akwata ku kupusukilamo. Filya e fyo Ainika ulupwa lwa kwe mu Mulu, ilyo luli pe sonde, ni Yesu Kristu.

¹¹³ Mwe lukuta, Mwe bantu, we munandi umubembu, wiesha ukusubila mu cintu cimbi kano Yesu Kristu. Wiesha ukusubila muli kashimikila uli onse. Wiesha ukusubila mu muntu uli

onse ku ku kupususha. Wiesha mu lukuta nangu lumo, amafundisho ayali yonse, icilonganino icili conse. Subileni fye muli Yesu Kristu, pantu Ena Lubuuto lwa ino nshita.

Ka tukontamike imitwe yesu.

Ku kabo Lubuuto pa nshita ya cungulo bushiku,
Inshila ya Kubukata cine cine mukaisanga;
Munshila ya menshi e muli Ulubuuto lelo,
Ukushikwa mwi Shina lya kwa Yesu ilisuma.
Abaice na bakalamba, lapileni ku membu
shenu shonse,
Mupashi wa Mushilo cine cine akengilamo;
Ama Lubuuto ya cungulo bushiku nayesa,
Fyena fishinka ukuti Lesa na Kristu baba Umo.

¹¹⁴ Owe, munyina, nkashi, nga tawatala ukulapila nanomba, nga tawabatishiwa mwi Shina lya kwa Yesu Kristu, bushe teti mutendeke ukucite ci muno bushiku. Bushe kuti mwapela Lesa ishuko ilya kumusekelela mu ncende umu mwinga Mupepa? Ibukisheni, kunse ya cilya, takwaba incende iyo Lesa alaile ku ku mukumanya no kusekelela ukupepa kwenu.

¹¹⁵ Muletila, “Munyina Branham, ndapepa mu bufuma cumi fye!” Na Kaini nao eflyo acitile. Apangile ica bupe ica musango uli onse ico Abele acitile, lelo cali icabupe icalubana. Kuti limbi muleya ku chalichi, no kulipila icekumi cenu, no kucito mulimo wenu onse nge fyo Mwinakristu alingile ukucita, ukuba fye uwa bufuma cumi ngo mwaume uli onse atemwa umwanakashi.

Nali iminina pano pa myaka amakumi yatatu, ukushinguluka umusumba muno, no kubilikisha Imbila iyi imo ine. Ndeya ndekota. Teti mbe naimwe inshita itali sana. Lelo ibukisheni, mu Bushiku bwa Bupingushi, ishiwi lyandi lile yambulwa, kabili likalanda ukwebaula imwe.

¹¹⁶ Kwaba fye incende imo iyo Lesa abikamo Ishina Lyakwe, kabili cilya te mu lukuta, lelo muli Yesu. Kwaba fye incende imo iya kupepelamo, incende fye imo iyo mwinga pokelelwamo, kabili nailya ni mu Mutemwikwa, Yesu Kristu. “Tapaba Ishina limbi pe samba lya Mulu, ilyapelwa pakati ka bantu, umu mwinga pusukila,” takuli ulukuta, takuli ifundisho, takuli nangu cimo. Yesu Kristu!

Kabili ilya eilingile ukuba Imbila ya ino nshita, “Ku kubwesha imitima ya bana, ukubwekela ku Citetekelo ico icapelwa limo ku ba shila.” Bushe ta mwa Cipokelele muno bushiku?

Kabili ilyo tucili natukontamika imitwe yesu.

¹¹⁷ Kabili abo abalefwaya uku bebukisha mwi pepo, kuti mwaimya fye amaboko yenu. Teti tukwate ubwite bwa kucipailo, pantu naba fulisha. Lesa amupale. Ine! Ku kwa kuso kwandi, ndetunganya bali imyanda itatu.

118 Nomba ku kwa kulyo kwandi, bushe kuti mwaimya amaboko yenu, musose, “Ndefwaya munjibukishe.” Ndetunganya bali umyanda umo na makumi yasano, atemwa ukucila, ku kwa kulyo kwandi.

Twali kwata tabernacle kuli cino cifulo ne cishiba icikulu ca menshi; kacema, kacema umusuma, Munyina Orman Neville, tubomba pamo nabo, aba baume abali kuno aba mulemona no ku kumanya. Cila bushiku, cila nshita ya bushiku, cila nsa, abantu abo abalefwaya uku batishiwa, abo abalapile, lyonse cilalolela. Kabili nga mwala umfwila lilye funde, muli abashininkisha, ku bulayo bwa kwa Lesa, nga muli aba bufuma cumi mu mitima yenu, ku kupokelela ulubatiso lwa Mupashi wa Mushilo.

119 Kwaba fye incende imo iyakupepelamo. Nomba, cilya tacaba mu Tabernacle. Cilya ni muli Kristu. Musango nshi twingengila muli Wene? “Ku Mupashi umo bonse tulabatishiwa muli uyu Umubili umo.”

Ka tupepe.

120 Mwe Lesa, nge fyo aya maboko yemishiwe, yacilangisha cilya ica ciba pesamba lya kulya kuboko mu mutima, ukushininwa ukuti bali abashininkisha balefwaya ubwafwilisho ukufuma kuli Imwe. Ndepepela onse muli bena, Tata. Kabili nalalanda Icebo Cenu. Mwatile, “Uyo umfwe Cebo Candi, no kucetekela pali Uyo uwa Ntumine, aba no Mweo wa muyayaya, kabili takese ku Bupingishi; lelo afuma mu mfwa aingila mu Mweo.”

Tata, pakuba kumbi ukufumamo mu musumba pa milungu inono, ukubwela, nalipwishe, “Inga *pali* uyu?”

“Cinshi, baliya.”

“Cisuma, inga ba . . .”

“Baliya.”

121 Mwe Lesa, umo na umo tuletwa, umo na umo tulingile uku kumanya ubwite ku kwenda ukupita mulya mu mipokapoka ya cinshingwa camfwa. Kabili cilya caba kuli onse muli ifwe, nga abafwa. Lelo, muno bushiku, na Mutupela ukupapata Kwenu, ukuti nga kuti twa cetekela muli Wene no ku batishiwa mwi Shina Lyakwe, ukuti Muli no kutwingishamo. Elyo kabili muli uyu Mubili, Umubili wa kwa Kristu, te mu lukuta; lelo mu Mubili wa kwa Kristu, ulyo Mubili na upingulwa kale. Tawakatale ukwisa ku Bupingushi. Lesa apongolwele icipyu Cakwe pali ulyo mubili kabili ulyo mubili tamwaba ulubembu; kabili, pakuba muli Wene, cila tubika ukukanaba mu lubembu, ukupitila mu Cakukonsolwela Cakwe icafwilile ifwe. Kabili mulya natukwata isenge umo no mubiye, ilyo Umulopa wakwa Yesu Kristu, Umwana wakwa Lesa, ulatusunga abasambwa ukufuma ku lubembu lonse no koweshiwa.

¹²² Tata, Lesa, ndepepa ukuti Muli no kubasenda bonse muli bena mu Bufumu Bwenu. Cipeleni, Mwe Lesa. Pekaluba nangu umo pali bena; pekaba nangu mulumendo atemwa umukashana, umwaume atemwa umwanakashi. Shikulu, bamo aba bantu bandi na bekala muno, muno bushiku, balya abali kunge ka ulya Mulopa. Efyo ndeibukisha bwino amashiwi ya batata! Kabili ndepepa, Mwe Lesa, ukuti pekaluba nangu umo pali bena. Cipeleni, Shikulu. Ndecetekela Imwe nomba, na fyonse ifyo nakwata ukucetekelako.

¹²³ Endeni pali ba munyine, naba nkashi, abanandi, muno muli ino ncende muno bushiku kabili na kulya lubali ukupitila muli lanya. Imisumba ingi iyapusana ilekutikako, ukufuma konse kulya ku Lulamba lwa Kukabanga ukuya ku Masamba. Ndepepa, Mwe Lesa, ukuya kulya ukuciluka iciswebebe kulya ku Tucson, ukuya mulya mu California, uko ku Nevada na Idaho, konse uko ku Kabanga kabili na nonse, na mu Texas; ilyo ubwite bucili na bupelwa, abantu nabekala mu—mu tu machalichi tunono, umwa kunwensha amafuta, mumayanda, balekutika. O Mwe Lesa, lekeni ulya umwaume uwaluba atemwa umwanakashi, umulumendo atemwa umukashana, pali ino nshita, ese kuli Imwe. Cipeleni ino ine nshita. Twa lombela mwi Shina lya kwa Yesu, ukuti bali no kusanga iyi ncende yaku cingililwako ilyo kucili nshita.

Lintu, tulemona amalemba pa cibumba, isonde ileya iletutuma, inshita ya kupokololwa ili mupepi. Iciputulwa ca calo cesu cileibila, iciputulwa cimbi ukukunkuluka no kupoleka ku finkukuma, nge fyo Yesu alaile fyali no kucitika. Mwileka cibe inshita itali kuli bena, Shikulu. Shi benga cipokelela nomba, pantu tulebapela kuli Imwe nge fikombe fya kulongana, kwa Mbila nsuma, mwi Shina lya kwa Yesu. Amen.

¹²⁴ Bushe mule Mucetekela? Lesa amupale. Nibanga abacetekela cilya ukube Cine, ku kwa kuso kwandi, imyeni amaboko yenu. Nibanga ku kwakulyo imyeni amaboko yenu. Lesa amupale. Ngefyo ningamona, uli onse. Ico ca Cine, mwe banandi. Lesa alishiba ico cishinka.

¹²⁵ Nomba ilyo muli muli Wene, kabili pakuba muli Wene, na mukwata insambu ku cili conse ico Afwililepo. Kabili cinshi ico Afwililepo? “Alashilwe pa fya bupulumushi bwesu, afwantilwe pa mampulu yesu; ukulimuna ukwa kutumwenamo ubutuntulu kwaponene pali Wene, na mu fipumo Fyakwe e mwaishilo kupola kuli ifwe.” Bushe mulecetekele co? Bushe mulecetekela mu cakukonsolwela Cakwe ku kuposha nomba?

¹²⁶ Bushe pali abalwele pakati kenu? Lekeni bemye amaboko yabo, kukwa kulyo atemwa ukwa kuso. Amabumba ayakulu aya malwele. Teti njite umulongo. Mwamona, nshicitile. . . teti bese kuno kuntanshi. Takuli inshila iya kucicitilamo.

Balekwata ukulongana kwa mapepo kulya mu ncende shimbi, ukwa balwele, mu nkuta na mumbi, kulya ku Tabernacle.

Nalamwipusha icinti cimo. Nibanga abacetekela abali kulya? Imyeni ukuboko kwenu. Cisuma. Nalalanda kuli imwe Icebo, icaba ni Kristu. Umulimo wa kulekelesha wa kwa Yesu kwi sonde, kabili na ku Lukuta, ntile, Asosele ifi, “Ifi fishibilo fikakonka abo abacetekela; nga babika indupi shabo palwele, bakaba abatuntulu.” Nibanga abaishiba ukuti cilya cishinka, Marko 16, soseni, “Ameni.” [Ulukuta lwatila, “Ameni.”—Ka.] Cisuma. Nde mulomba nga abacetekela ku kubika indupi shenu pa muntu umo uli ku ntanshi yenu. Biken i fye indupi shenu pamulu wa muntu umo ku ntanshi yenu, kabili lekeni ifwe bonse tupepelane umo no mubiye nomba. Biken i indupi shenu pamulu wa muntu umo mupepi naimwe.

¹²⁷ Shikulu, pano pantanshi yandi pali icibokoshi ca tutambala, utulundwa utunono twa fipe; mayo umo umukote nalala ku cifulo cimo, alefwa, akanya mupepi no kufwa, abantu abalwele ukuli konse. Tulabelenga mu Baibele ukuti babulile ukufuma ku mubili wakwa Paulo ututambala no tusalu, kabili baletubika pa balwele; kabili mipashi iya bipa, ne mipashi iya kowela, na malwele, no kucushiwa, kwafumine pa bantu. Nomba, Shikulu, twalishiba tatuli Paulo Washila, lelo twalishiba ukuti mucili nimwe Yesu, incende fye yeka iyapelwa na Lesa iya kupepelamo. Kabili nomba, lelo, aba bantu nabalumbule citetekelo cabo cimo cine, ukucetekela nge fyo balya bantu bacitile. Mucine na Mubapangila inshila! Kabili ndebika indupi shandi pali utu tutambala no kulomba ukuti amalwele no kucushiwa fikafumishiwapo pa mibili ya bantu ifi fikabikwapo mwi Shina Iya kwa Yesu Kristu.

¹²⁸ Nomba, twalifundwa, ukuti nge fyo Israel alefuma ukufuma mu Egupti, mu cishilwa ca mulimo, bali mu bulendo bwabo ku mpanga ya bulayo. Bemba wakashika acilingenye mu nshila yabo. Kabili Lesa alolekeshe panshi ukupitila mu Ntumba ya Mulilo, kabili na bema ali umfwile umwenso, ali kunkulukile mu mbali, no kuleka Israel ukupita ukuya ku mpanga ya bulayo. Mwe Lesa, lolesheni panshi ukupitila mu Mulopa wakwa Yesu, muno bushiku, kabili amalwele yenga kunkulukila ku numa, na Satana ukufumishiwa. Kabili na bantu benga pita kuli bulaya bulayo bwa bumi busuma na maka, ubo Lesa asosele, “Pa fintu fyonse, ndefwaya ukuti ube no bumi ubusuma.”

¹²⁹ Nomba nge fyo Mulemona palya, Shikulu Yesu, indupi shaba bantu nashibikwa pali umo no mubiye, shileiminako icicetekelo cabo, ico Mwasosele, “Ifi fishibilo fikakonka abacetekela.” Balepepa mu nshila yabo abene, kuli umo no mubiye. Umuntu uo bapalemene nankwe alebapepelako.

¹³⁰ Nomba, Shikulu, ubu bwite nabufikilishiwa ukuti Satana, kabepa umukalamba, takwata insambu ishakwikatilila umwana wakwa Lesa. Cibumbwa ica cimfiwa. Yesu Kristu, incende fye

yeka iya kupepelamo, Ishina lyeka ilya cine, amucimfishe pa Kabary. Kabili tuleipusha Umulopa Wakwe nomba line, ukuti Ali cimfishe amalwele no kucushiwa ukuli konse.

Kabili ndeba Satana ukulekelako ili bumba. Mwi Shina lyakwa Yesu Kristu, fuma muli aba abantu, kabili babe abantungwa.

¹³¹ Umuntu onse ulepokelela ukuposhiwa kwabo ukupitila pa mulingo wa Cebo icalembwa, peleni ubunte bwenu pa kwiminina pa nkasa shenu kabili musose, “Nomba ine ndepokelela ukuposhiwa kwandi mwi Shina Iya kwa Yesu Kristu.” Iminineni pa nkasa shenu.

Amalumbo kuli Lesa! Mwacimona co. Lolesheni kuno lubali, abalemana ne fintu baleima. Amalumbo kuli Lesa. Ico eco. Cetekeleni fye. Ali pano. Ifyo cawama!

¹³² Kunse mwi bumba, apo panse, pa malamya, mulingile ukumona! Ndetontonkanya umuntu onse uli muno, ukulingana nge fyo naishiba, atemwa abengi muli bena, na beminina pali ino nshita. Yangu, ino ninshita iyawama! Umulola wa kwa Shikulu, ico ni cinshi! “Uko ukuli Umulola wa kwa Shikulu, kuli umutende, kuli ubuntungwa.” Umupashi wa kwa Lesa ulatulenga ukuba abantungwa.

¹³³ Nomba apo Natuposha, tule cicetekela. Ali tupuswishe; tule cicetekela. Abo abalefwaya ukubatishiwa, icishiba na citeyanishiwa. Inshita ili yonse, insa ili yonse iyo mulefwaya ukwisa, kuli nokuba umuntu umo kulya ku kubomba cilya.

Kabili nomba ndetontonkanya, ilyo tatulaisala, tulingile ukwimba ulwimho lwakale ulwa lukuta. “Nali Mutemwa, Nali Mutemwa, pantu Ali balilepo uku ntemwa.” Imyeni amaboko yenu kuli Lesa kabili mulwimbe ne mitima yesu yonse!

Tulefwaya tuka mukumanye kuno mu lucelo, pa naini-sate, cino cine icikulwa, kwisambililo Iya *Cupo No Kulekana*. Cisuma.

Lekeni tulwimbe nomba capamo.

Nali Mutemwa,

Lekeni ili bumba ilikalamba limbe ulu nomba! Uko kutali pali balamya, lwimbeni, naimwe.

Pantu Ali balilepo ukuntemwa

No kushita ipusukilo lyandi

Pa cimuti ca Kabale.

¹³⁴ Nikwisa uko ca citilwe? Pa cimuti ca Kalbale. Ilyo tulelwimba nakabili, ndefwaya imwe muposhanye mu maboko no muntu umo upalamine kuli imwe, soseni, “Lesa akupale, we mulendo.”

Ine . . .

[Munyina Branham aleposhanya mu maboko na bamunyina—Ka]

Pantu intanshi Ali . . .
 No kushita ipusukilo lyandi
 Pa . . .

¹³⁵ Owe, bushe ta mwa Mutemwa? [Ulukuta lwatila, "Ameni."—Ka.] Bushe Ta wama? ["Ameni."] Bushe Aba Encende yenu Yakufisamamo? ["Ameni."] Ena e Cilibwe mu mpanga ya funshika, Icubo mu nshita ya cipupu, Umwakubutukila mweka naishiba. Eico:

Nabebeta Imwe,
 Mwali pa Kalbale,
 Mopusushi;
 Mung'umfwe mwi pepo,
 Fibi mufumyemo,
 Ndetendeke lelo
 Kuba Wenu!

Ka twimye amaboko yesu ilyo tulelwimba.

Nabebeta Imwe,
 Mwali pa Kalbale,
 Mopusushi;
 Mung, umfwe mwi pepo,
 Fibi mufumyemo,
 Ndetendeke lelo
 Kuba Wenu!

Ka tukontamike imitwe yesu nombamba ilyo tule lung'wing'winta.

Nga nyenda mu mfifi,
 Yaisa macushi,
 Ntungululwe;
 Mfifi bya kasuba,
 Mufumyo kucula,
 Mundesho kufuma
 Kuli Imwe.

Ilyo mucili ne mitwe yenu iya kontamikwa, umutemwikwa kacema wesu, Munyina Orman Neville, alasalanganye bumba.



Incende Iyasalwa Na Lesa Iya Kupepelamo, Vol. 3 No. 3

(God's Chosen Place Of Worship, Vol. 5 No. 7R)

Iyi Mbila ukufuma kuli Munyina William Marrion Branham, yabalilepo ukuletwa mu cingeleshi pali Icibelushi mu cungulo bushiku, Februali 20, 1965, Parkview Junior High School auditorium mu Jeffersonville, Indiana, U.S.A., yalyambulwa ukufuma pali magnetiki tepu uwakopwa elyo no kupulintwa mu Cingeleshi ukwabula ukushamo nelyo cimo. Uku kupilibulwa kwa mu Cibemba kwalembelwe mu 1995 na ba Voice of God Recordings.

VOICE OF GOD RECORDINGS

P.O. Box 950, Jeffersonville, Indiana 47131 U.S.A.

Icishibisho ukufuma ku mwine kalemba

Insambu shonse tashisuminishiwe. Ili buku kuti lya lembwa pali pulinta yapa ng'anda ku kubomfya kwa muntu pa lwakwe nangu ukupela, ukwabula amalipilo, nge cipe caku sabankanya Imbila nsuma iya kwa Yesu Kristu. Ili buku tekuti lishitishiwe, ukulembululwamo ayengi, ukubikwa pa mwela, ukusungila muli ba mashini, ukwalula mu ndimi shimbi, nangu ukuli bomfya ku kulomba indalama ukwabula insambu shalebwa na ba Voice Of God Recordings®.

Nga mulefwaya ukwishibilapo nafimbi nangu ukufwaya na fimbi ifyabapo, twalomba tumeni kuli ba:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org